

四庫全書

經部

欽定四庫全書

春秋地名攷畧卷九

詹事府詹事高士奇撰

楚下

沈

宣十二年戰于郟沈尹將中軍杜注沈或作寢寢縣也今汝陰固始縣臣謹按此沈國之別邑也

而楚取之以為重鎮故沈尹見于春秋甚詳時為沈尹者莊王之子公子貞也靈王時有沈尹射見于昭四年平王時有沈尹赤見于五年自是至昭王時有沈尹戌十八年二十四年二十七年三十年三十一年九見惠王時有沈尹朱見于哀十七年至哀十八年巴人伐楚惠王使子國為帥請

承王曰寢尹工尹勤先君者也三月楚公孫寧吳  
由于遂固敗巴師于鄢杜注柏舉之役寢尹吳由  
于以背受戈工尹固執燧象以奔吳師皆為先君  
勤勞蓋沈尹戌戰死于柏舉而由于繼之為寢尹  
也杜云沈尹或作寢實本于此孔穎達曰哀十八年  
有寢尹吳由于因解寢為縣是也然則是邑豈本  
名寢楚人因取之于沈遂謂之沈與乃寢尹之後  
仍有沈尹則二名兼行矣又史記楚莊王召孫叔  
敖子封之寢丘四百戶以奉其祀十世不絕列子  
孫叔敖疾將死戒其子曰我死王則封汝汝必無  
受利地楚越之間有寢丘者此地不利而名甚惡  
楚人鬼而越人禩可長有者唯此也孫叔敖死王  
果以美地封其子子辭而不受請寢丘與之即此  
邑之分壤矣史記蒙恬伐寢漢置寢縣屬汝南郡  
建武二年司空李通慕叔敖之受瘠土願封此邑  
光武嘉之遂改名固始晉屬汝陰郡宋屬新蔡郡

後因之隋末于寢丘地別置沈丘縣又立沈州治之唐廢州以縣屬汝陰郡唐志云沈丘本郟州鎮沈丘宛丘唐初州廢以宛丘屬陳州沈丘來屬後省沈丘入汝陰神龍三年復置是也杜氏通典云沈丘隋置沈州神龍初分汝陰縣置又云汝陰固始皆漢寢丘此誤也夫漢時汝陰寢縣並置不可謂汝陰為寢縣地晉時又兩縣並存如果寢丘在汝陰杜預即不云在固始矣蓋隋置沈丘原分固始唐省入汝陰而復置通典遂以傳訛理甚明也荀子曰楚之孫叔敖期思之鄙人也呂氏春秋孫叔敖沈尹筮相與友善沈尹筮遊于郢荆王欲以為令尹沈尹筮辭曰期思之鄙人有孫叔敖者聖人也王必用之期思亦為固始地然則寢丘本叔敖之鄉縣而因以封之尤足證寢丘之屬固始矣汝陰為今潁州屬鳳陽府固始屬光州沈丘屬陳州三縣分割屬三郡而地則相接沈丘縣南百步

有寢丘云再考漢延熹三年有孫叔敖碑叔敖子辭父有命欲有賞必于潘國下濕境塢人所不

貪遂封潘鄉與此不同

蒲胥之市

宣十四年楚子伐宋車及于蒲胥之市

州來

宣七年吳入州來杜注州來楚邑淮南下蔡縣是也臣謹按左傳申公巫臣教吳叛楚始伐

楚伐巢伐徐馬陵之會吳入州來蠻夷附于楚者吳盡取之高氏曰吳楚爭強始見于此昭四年吳

伐楚入棘櫟麻楚沈尹射奔命于夏汭歲尹宜咎城鍾離遂啟疆城巢然丹城州來楚自是始患吳

矣十二年靈王狩于州來次于潁尾使蕩侯潘子司馬督囂尹午陵尹喜帥師圍徐以懼吳明年楚

亂王縊于乾谿楚師還自徐吳入敗諸豫章獲其五帥及平王即位吳滅州來令尹子旗請伐吳王

勿許曰吾未撫民人敗不可悔州來在吳猶在楚也十八年楚人城州來沈尹戌曰昔吳滅州來子旗請伐之王曰吾未撫吾民今亦如之而城州來以挑吳能無敗乎二十三年吳人伐州來楚薳越帥師及諸侯之師奔命救州來戰于雞父楚師大奔由是州來遂入于吳而入郢之禍兆于此矣林氏曰吳之始圖楚也爭巢鍾離州來三邑蓋七十年而後取之楚失淮由失州來也是已吳得州來以封季札季札初封延陵後邑于此故曰延州來季子哀二年蔡昭侯自新蔡遷于州來謂之下蔡蓋為吳所遷也其後楚滅吳至考烈王二十二年西逼于秦徙都壽春在淮之南與下蔡夾淮為固漢置下蔡縣屬沛郡後漢屬九江郡漢末袁術據壽春曹操得之以為重鎮置淮南郡下蔡縣屬焉晉仍之後魏置下蔡郡于此自是常以重兵戍守梁于硤石山下築城以拒魏謂之下蔡新城水經

注曰淮水自硤石北逕下蔡故城東淮之東岸又有一城曰下蔡新城二城對據翼蔽淮濱大通中魏亂梁得下蔡改置汴郡齊廢郡隋仍為下蔡縣屬潁州唐嘗置渦州尋廢唐末廢為下蔡鎮五代周顯德三年發陳蔡諸州丁夫築下蔡城四年壽州降遂徙治下蔡宋亦為壽州治後又改州曰壽春府時亦謂下蔡為北壽春而壽春縣為南壽春紹興六年楊沂中等敗劉猷于藕塘追至南壽春而還此即壽春縣也十一年烏珠陷壽春乃渡淮陷廬州此壽春即下蔡城也乾道三年改置安豐軍于壽春縣下蔡縣屬焉元因之元末江淮多事下蔡縣始廢里道記下蔡西抵正陽鎮五十五里今壽州即古壽春縣城為楚考烈王所築州北三十里有蔡國城即下蔡矣

呂  
成七年子重請申呂為賞田王許之申公巫臣曰不可此申呂所以邑也以是為賦以御北方若取

之是無申呂也晉鄭必至于漢臣謹按呂為虞夏時國周穆王時呂侯為司寇作呂刑國語史伯曰當成周者南有申呂後并于楚呂后時封昆弟子呂恕為呂城侯今南陽府城西三十里有呂城

俗名董

呂村

鄧

成九年鄭伯會楚公子成于鄧臣謹按桓二年蔡侯鄭伯會于鄧穀梁傳曰鄧某地不知其國故

云某公羊傳曰離不言會其言會何蓋鄧與會爾又賈逵服虔並以鄧為國而正義駁之云蔡鄭懼楚始為此會不應就近楚小國故知非鄧國也昭十三年楚蔡公名子干子皙盟于鄧杜註潁川召陵縣西南有鄧城推知桓二成九兩會皆在此矣戰國時楚懷王伐秦敗于藍田韓魏聞之南襲楚至鄧又秦昭襄王十六年司馬錯取鄧封公子悝于鄧即此今鄧城縣東南三十五里有鄧襄城

鍾離

成十五年諸國大夫會吳于鍾離杜註楚邑淮南縣臣謹按古鍾離子國春秋時屬楚昭四

年楚歲尹宜咎城鍾離以備吳二十三年吳禦楚師于鍾離子瑕卒楚師燬二十四年楚子為舟師以畧吳疆師還吳踵楚遂滅巢及鍾離史記齊世家靈公十九年令公子光會諸侯盟于鍾離此即襄十年之會祖也蓋誤為鍾離又楚世家平王時吳之邊疆卑梁女子與楚邊邑鍾離小僮爭桑兩家交怒相攻遂滅卑梁入卑梁大夫怒發邑兵攻鍾離楚王聞之怒發國兵滅卑梁吳王大怒亦發兵使公子攻楚遂拔鍾離居巢楚恐而城郢此即昭二十四年事與春秋傳亦少異秦置鍾離縣漢因之屬九江郡建安二年呂布討袁術至鍾離而還晉亦為鍾離縣屬淮南郡成帝置鍾離郡治此宋因之泰始三年淮北陷徐州移鎮鍾離薺時亦為徐州治建武二年魏主循淮而東至鍾離崔慧

景赴救魏不能克梁天監五年魏取馬頭城魏將  
元英等進圍鍾離邢巒謂鍾離天險必無克狀魏  
主不聽梁遣曹景宗督軍二十萬赴救魏人敗走  
十三年魏降人王足獻計堰淮水以灌壽陽梁令  
太子右衛率康絢董其役于鍾離南起浮山北抵  
巉石堰長九里淮水清激俯視居人廬墓皆在其  
下魏壽陽戍移于八公山南北居人散就岡壑至  
九月淮水暴漲堰壞水決其聲如雷聲聞三百里  
太清三年北徐州刺史蕭正表以鍾離降魏高齊  
時改置楚州治焉隋開皇三年廢鍾離郡改楚州  
曰濠州大業復改為鍾離郡唐置濠州鍾離縣治  
于城外五代時淮南南唐有其地周顯德四年攻  
拔之仍為濠州治宋元因之明初改濠州為臨濠  
府洪武三年改鍾離縣為中立縣五年又改府亦  
名中立尋改縣為臨淮縣七年析臨淮地置鳳陽  
縣改府曰鳳陽移治之今仍之鍾離舊城在今縣

東四里自唐時  
縣移今治也

新石

成十五年鄭子罕侵楚取新石  
杜註楚邑或曰在裕州葉縣

汝陰之田

成十六年楚使公子成以汝陰之田求成  
于鄭杜注汝水之南近鄭地臣謹按楚

文王封畛于汝蓋楚地止于汝水之南今汝水出  
魯山縣至潁州入淮其在汝州郊縣及裕州葉縣  
間者汝陰田也漢汝陰縣今  
潁州也或以古地名與

瑕

成十六年楚師還及瑕杜註楚地臣謹按水經  
注肥水逕山桑縣故城南又東積而為陂謂之瑕

陂陂水又東南逕瑕城南春秋楚師還及瑕即此  
城也京相璠曰瑕楚地肥水又東南逕向縣故城

南山桑漢縣在今壽州蒙城縣北  
或曰瑕即襄城縣之汾丘城也

駕釐

成十七年吳人圍巢伐駕圍釐杜注巢駕釐

邑也二十六年聲子曰吳于是伐巢取駕克

釐

見上 玉海仲釐城在徐州沛縣南

繁陽

襄四年楚師為陳叛故猶在繁陽杜註繁陽楚

諸侯及東夷伐吳遠射以繁陽之師會于夏汭又

楚大夫子期又以陵師敗于繁陽陽漢縣屬汝

南郡鮑音紂明帝封陰慶為侯邑又于此置宋公

國章帝建初四年徙殷後宋公于此有繁陽亭晉

今新蔡縣繁陽亭在縣北宋公國即

春秋地名攷畧

六

祖

襄十年會吳于祖杜註楚地臣謹按漢志偃陽有祖水水經京相璠曰偃陽縣西北有祖水溝去

偃陽八十里東南流經偃陽城東北又南亂于沂

而注于沭謂之祖口即楚之祖地也今山東兗州

府嶧縣東南有渣口戌祖與渣俱音

側加反即今加河入承水之加口云

庸浦

襄十三年吳侵楚子庚從之戰于庸浦杜註庸浦楚地或曰在今無為州南濱江之浦也

崇

襄十四年楚子囊師于崇以伐吳臣謹按昭二十年伍奢長子曰崇公尚寔宇記六合古崇邑漢

堂邑縣屬臨淮郡晉立堂堂邑郡周改方州六合郡隋廢郡為六合縣省堂邑縣入之今仍之

湛阪

襄十六年楚公子格帥師及晉師戰于湛阪楚師敗績晉師遂侵方域之外杜註昆陽縣北有

湛水東入汝臣謹按周禮荊州其浸潁湛水經注湛水出犍縣北魚齒山東南流為湛浦方五十

餘步春秋晉楚戰于湛阪即此水北悉枕山阜父城東南湛水之北有長阪蓋即湛水以名阪也又東南逕蒲城北京相璠曰昆陽縣北有蒲城蒲城北有湛水是也又東北入于汝今在葉縣北三十里昆陽漢縣屬潁川郡晉屬襄城郡後廢今葉縣北二十里有昆陽城

汾丘襄十八年楚子庚治兵于汾杜註襄城東北有汾丘城臣謹按戰國策楚北有汾陁之塞史記秦

昭王四十年攻韓汾陁拔之蓋與新鄭陁山俱為南北隘道楚嘗于此為塞以禦北方後漢志襄城縣有汾丘水經注潁水自潁陰又東歷置丘城南故汾丘城也今在許州襄城縣東北別見本卷地瑕

雩婁

襄二十六年楚子秦人侵吳及雩婁杜註今屬安豐郡臣謹按昭五年楚使沈尹射待命于

巢遠啟疆待命于雩婁即此淮南子楚相孫叔敖決期思之陂灌雩婁之野期思陂即芍陂也意林叔敖作期思陂而荆之土田贍對境圖叔敖引泚水為子午渠開六門灌田萬頃皆指雩婁矣漢置雩婁縣屬廬江郡晉屬安豐郡劉宋嘗于此置邊城左郡齊罷梁復置後魏因之後周縣廢水經決水出廬江雩婁縣大別山俗名檀山峴北過其縣即春秋楚秦侵吳處也又北過安豐縣東建武八年封大將軍涼州牧竇融為侯國晉立安豐郡又許慎曰灌水出雩婁縣俗謂之滄水褚先生所謂神龜出于江灌之間者東過蓼縣入于決水又巴水出雩婁縣之下靈山即大別山也壽春記金明城西南一百二十里有雩婁城堯之婁子城也寰宇記雩婁近壽春廢霍丘城今雩婁城在霍丘縣西南八十里期思城在固始縣境二邑相隣並也水經注云雩婁縣故吳也此誤本傳原云知吳有

備而還是不入吳境也又為叔敖陂水所溉其為  
楚地明矣雪婁之大別與夏口之大別為二山

棘

襄二十六年聲子曰吳于是伐巢取駕克棘入州  
來杜註駕棘皆楚邑譙國鄴縣東北有棘亭臣

謹按鄴漢縣屬沛郡晉屬譙郡今在永  
城縣西南縣有棘亭在古鄴城東北

荆山

昭四年荆山中南九州之險杜註荆山在新城  
汴鄉縣南臣謹按禹貢荆及衡陽惟荊州傳

云北據荆山南及衡山之陽又荆河惟豫州傳云  
西南至荆山北距河水蓋以荆山為二州之界也

昭十三年楚遷許胡沈道房申于荆杜註荆荆山  
也是荆山之為地廣矣又子草曰昔我先君熊繹

辟在荆山則以地近西境為言今  
荆山在南漳縣西詳見卷首丹陽

塗山

昭四年穆有塗山之會杜注塗山在壽春東北  
臣謹按哀七年子服景伯曰禹會諸侯于塗

山執玉帛者萬國即此漢順帝末九江盜徐鳳稱  
無上將軍馬勉稱帝築宮當塗山中五代周顯德  
三年宋師圍壽春南唐唐兵營于塗山之下周主  
命趙匡胤擊敗之唐六典塗山淮南道名山之一  
水經注荆塗二山本相連為一脈禹以桐柏之流  
泛濫為害乃鑿山為二以通之今山在鳳陽府懷  
遠縣東南八里兩  
山間有斷接谷

櫟

昭四年吳伐楚入棘櫟麻楚沈尹射奔命于夏  
杜註汝陰新蔡縣東北有櫟亭臣謹按櫟亭南  
北朝為戍守之所蕭齊建武三年魏寇司州齊櫟  
城戍主魏僧珉拒破之即此今在新蔡縣北二十

五里俗名野  
櫟店棘見上

麻

見上臣謹按魏收志碭郡安陽縣治  
麻城索隱襄城縣有麻城未知孰是

夏汭

傳見上杜註夏汭漢水曲入江今夏口也吳兵在東北楚盛兵在東南以絕其後臣謹按此

楚人用兵江上之始也世本楚熊渠封中子紅為鄂王史記熊渠當周夷王時興兵伐庸揚粵至于鄂其地為今武昌縣在武昌府東北百八十里武昌府即古夏口也是知立國之始即為重鎮矣吳人侵擾楚疆多自淮右北道蓋以沂江仰攻勢不便也而楚亦從北道應之至是出夏汭始欲順流東向以制吳五年楚子伐吳遂啟疆以繁陽之師會于夏汭十七年吳伐楚卜戰司馬子魚曰吾得上流何故不吉戰于長岸大敗吳師所謂上流即夏汭矣定四年吳自北道伐楚子常濟漢而陳自小別至于大別大別即在夏口在當時猶不失為牽制之計乃以速戰致敗焉前後參觀夏汭之重可見矣漢志華容縣有夏水首受江東入沔應劭曰江別入沔為夏水夏水始于分江冬竭夏流故

名曰夏水經注夏水出江流于江陵縣東南謂之中夏口是夏水之首江之汜也屈原所謂過夏首而西浮望龍門而不見者也又東過華容縣南又東至江夏雲杜縣入于沔當水之所出謂之堵口左傳所謂夏沔也荊州記夏水入江處謂之夏沔蓋夏水之尾也即楚辭所謂背夏浦而西思者今監利縣為漢華容沔陽州漢雲杜縣地有長夏河逕大馬長川柴林直埠而入于漢即此水也夏沔漢為江夏郡之沙羨縣之地後漢末謂之夏口亦曰漢口亦曰沔口蓋沔之下流為漢夏水亦會三水共出此口也亦謂之魯口以魯山得名魯山即大別山也劉表以黃祖為江夏太守始于沙羨置屯扼夏口孫權攻克之劉先主為曹操所敗自當陽走渡沔至夏口建安四年孫權築夏口城在黃鵠山之東北沙羨城正對之為樓名黃鶴樓以魯肅為夏口督晉時陶侃山簡庾翼桓沖相繼鎮之

桓氏遂于此作逆劉毅討平之以劉道規鎮夏口  
宋孝建元年置郢州又移江夏郡及郢州並治夏  
口亦謂之郢城時議以郢州治巴陵何尚之曰夏  
口在荆江之中正對沔口通接雍梁實為津要從  
之蕭衍舉兵襄陽築漢口城以守魯山又命水軍  
主張惠紹等遊遏江中絕郢魯二城信使久之二  
城相繼降遂趣建康大寶二年侯景襲陷江夏守  
郢城湘東王繹攻克之後為北齊所取已又歸于  
陳隋平陳改置鄂州隋唐間廢置不一卒如故李  
吉甫曰鄂州春秋時之夏汭章懷太子賢曰夏口  
實在江北至唐置鄂州而夏口之名移于江南沔  
水入江之口止謂漢口夏口之名遂與漢口對立  
分據江南北矣五代唐遙改為武昌軍南唐因之  
宋仍曰鄂州元曰武昌路明曰武昌府今仍之  
再按昭十三年王治夏欲入鄢杜註曰夏漢別名  
順流為沿順漢水南至鄢此時靈王歸自乾谿至

訾梁而衆潰獨身脫走云欲順流入鄆則猶在宜城之北漢水之上流也乃遽謂之夏若水經注則又通一水皆謂之沔知三名為通稱矣禹貢梁州浮于潛逾于沔入于渭亂于河又嶓冢導漾東流為漢孔安國傳曰泉始出山為漾水南流為沔水至漢中東流為漢水孔穎達曰漢水之尾變為夏水是則三名各有分地襍稱之者由于里俗相沿耳如淳曰北方人謂漢為沔是也然則水經以全漢為沔是舉首以該尾左傳以全漢為夏是舉尾以該首也附鄂春秋時楚邑秦為鄂縣漢屬江夏郡孫權改置武昌縣并置武昌郡治此建行都焉黃龍元年權遷都建業使陸遜輔太子鎮此隋廢郡縣仍屬江夏唐屬鄂州宋太姥廟孫權常獵于山軍元罷軍今屬武昌府有太姥廟孫權常獵于山下得一豹遇一姥曰何不豎豹尾漢官儀天子鹵簿中屬車施豹尾權誦其事故為立廟又有釣臺

北背大江攢嘗宴羣臣極飲其上曰醉墮臺下乃已即此也

瑣

昭五年楚伐吳越大夫常壽過會楚子于瑣杜註瑣楚地或曰在今壽州霍丘縣東

鵲岸

聞吳師出遂啟疆帥師從之吳人敗諸鵲岸杜註廬江舒縣有鵲尾渚臣謹按志云今廬江

府舒城縣治西北有鵲亭即杜預所云也然遂射自夏汭出遂啟疆別從江道不應在內地杜佑曰南陵大江中有鵲尾洲即古鵲岸也此說可通今江南太平府繁昌縣西南大江中有鵲尾洲又池州府銅陵縣北十里有鵲頭山高聳臨江或以為即鵲岸也宋泰始二年晉安王子勛舉兵江州遣其將陶亮軍鵲洲前鋒孫冲之軍赭圻尋名之還鵲又劉胡率衆繼至鵲尾袁凱率樓船千艘來入鵲尾是鵲尾即鵲洲也今為揚夾沙鎮宋元凶劬之亂武陵王駿軍于鵲頭孝建初南郡王義宣舉

兵鵲頭梁承聖初王僧辨討侯景遣侯瑱襲鵲頭  
戍克之唐李孝恭討輔公祐拔其鵲頭鎮蓋二地  
本相連常為  
戰爭之區矣

羅汭

楚子以驛至于羅汭杜註羅水名臣謹按信  
陽州羅山縣舊有羅水北入淮楚子當至此也

考本傳楚子在瑣闥吳師出遠啟疆從之而敗則  
當時出師蓋分南北二道所以楚子至羅汭也或  
言即汨羅不應返  
過洞庭湖南謬

萊山

昭五年楚師濟于羅汭沈尹赤會楚子于萊山  
遂射帥繁陽之師先入南懷及汝清吳不可入

楚子遂觀兵于坻箕之山杜註南懷汝清皆楚界  
臣謹按光州光山縣南百五十里有天臺山或

云即  
萊山

南懷

汝清

見上 臣謹按  
應在今江淮間

坻箕之山

見上 臣謹按無為州巢縣南三十七里有踟躕山輿地志以為即坻箕山

豫章

昭六年楚使蘧洩伐徐吳人救之令尹子蕩帥師伐吳師于豫章而次于乾谿吳人敗其師于

房鍾 臣謹按此豫章杜無註後十三年楚師還自徐吳人敗諸豫章獲其五帥杜註云定二年楚

人伐吳師于豫章吳人見舟于豫章而潛師于巢以軍楚師于豫章又柏舉之役吳人舍舟于淮自

豫章與楚夾漢此皆當在江北淮水南蓋後徙江南豫章依此則豫章四見于傳總為一地矣乃柏

舉注又云吳乘舟從淮來過蔡而舍之豫章漢東江北地名與前文小異說者曰書大傳釋禹貢內

方山一名章山今德安府城東四十里有章山即吳人與楚夾漢之豫章也圖經云豫章即章山一

名障山晉太安二年華宏討義陽賊張昌于江夏  
敗于障山即此是說也施諸吳楚夾漢則可以解  
定二年之見舟豫章必不可合矣蓋是役以伐桐  
故本傳曰桐叛楚吳子使舒鳩氏誘楚人曰以師  
臨我我伐桐為我使之無忌秋楚囊瓦伐吳師于  
豫章吳人見舟于豫章而潛師于巢冬十月吳軍  
楚師于豫章敗之遂圍巢克之獲公子繁杜註桐  
小國廬江舒縣西南有桐鄉舒鳩楚屬國吳教舒  
鳩誘楚師臨吳偽若畏楚師之臨己而為伐其叛  
國以取媚者也欲使楚不忌吳所謂多方以誤之  
也若然則始焉楚人出師繼焉吳偽從楚而見舟  
終焉忽變為對壘皆當在近桐之地今舒城有桐  
鄉即古桐國也鳳陽以西壽霍光因之境皆近淮  
壩為吳楚日交兵處舒城正在其南所謂豫章當  
在此際矣若云在德安則相距千餘里吳方為狡  
計以誑楚誘楚入其境而徐就之安得西馳千里

以迎楚師楚又豈可駐師近郊而召吳于千里之外乎且吳舟亦不能見于德安也由是推之伐徐之五帥吳亦不能深入窮追而獲之于德安乾溪在亳州又與德安絕遠皆不可通矣豈淮南漢東有兩豫章乎則不然昭三十一年吳人圍弦左司馬成石司馬稽率師救弦及豫章古弦國即今光山縣與前說亦合即柏舉之役左司馬議悉方城外以毀其舟塞城口以斷其歸路是吳師入楚之徑班班可考也然傳之本文原云自豫章與楚夾漢不言至豫章與楚夾漢也又其後左司馬及息聞楚師敗而還息縣去光山四十五里且不及毀舟而遽還又未始不與前說合也蓋吳人舍舟淮汭從陸路循淮以西入城口以至于漢言自豫章者特舉其遵陸之始耳杜註前一條本屬至當後一條云過蔡而舍舟息猶在蔡東未免模稜兩可矣以夾漢之文而疑豫章在漢東未免模稜兩可矣

若圖經所謂章山即豫章傳會不根無足深辨特  
欲見杜氏誤註漢東之失故反覆詳之焉再按  
昭二十四年楚子為舟師以略吳疆越大夫胥犴  
勞王于豫章之汭越公子倉歸王乘舟倉及壽夢  
帥師從王王及圍陽而還依此則豫章為水濱矣  
淮南漢東皆非越之舟師所得至必又一豫章矣  
蓋古者列國諸侯以征伐朝會過于他國之竟則  
有迎勞之禮如楚子伐陸渾王使王孫滿勞楚子  
魯襄公過鄭伯有勞于黃崖是也此豫章之汭必  
在楚越之境杜氏通典饒州餘汗縣越王勾踐之  
西界所謂干越也干越出越絕書越之餘也史記  
貨殖傳譬猶戎狄干越之不相入寰宇記餘干縣  
西南有干越渡至漢時淮南王安獻議猶曰越人  
欲為變必先田餘汗界中蓋今餘汗縣以東皆越  
地矣史記闔廬十一年吳伐楚取番番即今鄱陽  
而楚嘗有此然則楚越相接之境亦有可考者矣

哀十九年越人侵楚以誤吳也夏楚公子慶公子  
寬追越師至冥不及而還此又楚越相隣之明驗  
元和志洪州春秋時楚之東境江州春秋吳之西  
境文獻通考洪州江州春秋屬楚方輿勝覽隆興  
府饒州春秋屬楚南康軍春秋時吳楚之地洪州  
江州既為楚境則宣饒南康之境皆為吳疆又有  
彭蠡巨浸橫亘于中則舟師所掠越大夫迎勞之  
地從可想見矣漢高帝分秦九江郡置豫章郡水  
經注贛水一名豫章水逕廬陵以及南昌雷次宗  
曰豫章郡以水得名所謂豫章之汭即此無疑也  
蓋與淮南之豫章各為一地杜言自江北  
遷于江南不知何所根據恐未為質論也

乾谿

見上杜註在譙國城父縣南楚東竟臣謹按  
新序楚王起章華之臺為乾谿之役在舊城父

縣南五里城父舊城在  
今亳州東南七十里

# 章華之臺

昭七年楚為章華之宮納亡人以實之杜  
註章華南郡華容縣楚子成章華之臺杜

註臺今在華容城內臣謹按韋昭註章華地名  
吳語曰乃築臺章華之上杜氏亦以華容釋章華

蓋即華容為章華矣史記楚靈王七年就章華臺  
賈子翟王使使之楚楚王誇之章華臺三休乃至

因謂之三休臺東方朔曰楚王起章華之臺而民  
散是也曹操敗于赤壁引軍走華容道即此華容

漢縣晉省復置後周廢今監利縣東五里有華容  
城縣東北三十里有章華臺又縣三十里土洲之

南有荆臺家語楚王遊荆臺即此也又江陵沙  
市鎮有章華臺荆州志云故楚離宮也亦曰豫章

臺今為  
章臺寺

# 城父

昭九年楚公子棄疾遷許于夷實城父取州來  
淮北之田以益之伍舉授許男田然丹遷城父

人于城以夷濮西田益之遷方城外人于許杜註  
此時改城父為夷故傳實之城父縣屬譙郡臣  
謹按楚有兩城父此所謂夷城父取諸陳者也僖  
二十三年楚伐陳取焦夷杜註夷一名城父即此  
焦邑別見陳地襄元年晉以諸侯伐陳遂侵楚焦  
夷昭九年遷許後四年許自夷還居于葉昭三十  
年吳滅徐徐子章羽奔楚楚城夷而處之三十一  
年吳人侵楚楚伐夷蓋夷城父二名兼用也秦二世  
二年遣長史司馬欣董翳擊盜殺陳勝于城父漢  
五年劉賈軍從壽春屠城父至垓下尋置城父縣  
屬沛郡後漢屬沛國晉屬譙郡劉宋僑置浚儀縣  
屬陳留郡以城父縣并入後魏因之梁普通六年  
裴邃拔魏鄭城魏元琛赴救軍于城父不敢進大  
同初遣將元慶和攻東魏城父高歡遣竇泰據城  
父拒之後齊亦曰浚儀縣隋開皇十八年復曰城  
父屬亳州唐因之中末以朱全忠父名誠改縣

曰焦夷光啟初秦宗權寇亳潁朱全忠敗之于焦夷是也五代梁又改曰夷父後唐復為城父縣宋因之仍屬亳州元初省入譙縣尋復置明初省復省譙縣入亳州今亳州東南七十里有城父城昭十九年費無極言于楚子大城城父而寘太子焉以通北方王收南方是得天下也故太子建居于城父杜註城父今襄城城父縣此又一城父也二十年費無極謂楚子太子建與伍奢將以方城之外叛王使城父司馬奮揚殺太子未至而使遣之使城父人執己以至哀六年吳伐陳楚子救陳師于城父秋昭王攻大冥卒于城父史記秦始皇二十二年李信破楚鄢郢引軍而西與蒙恬會城父即此漢置父城縣屬潁川郡光武攻父城不下屯中車鄉獲馮異處也班固曰潁川有父城沛郡有城父晉亦為父城縣屬襄城郡後廢司馬彪曰父城西南即中車鄉今汝州郟縣西四十里有父

城

夷濮西田

見上杜註以夷田在濮水西者與城父人臣謹按水經注淮水過壽春北夏肥水

注之夏肥水上承沙水東南流逕城父縣故城南春秋所謂夷田在濮水西者也然則濮水沙水之兼稱或曰濮水舊在亳州西境今堙

岡山

昭十一年楚子滅蔡用隱太子于岡山無考

不羹

昭十一年楚子城陳蔡不羹杜註襄城縣東南有不羹城定陵西北有不羹亭臣謹按十二

年楚靈王謂子革曰今我大城陳蔡不羹賦皆千乘諸侯其畏我乎對曰是四國者專足畏也杜註四國陳蔡二不羹水經注汝水逕襄城縣故城南又東南逕西不羹城南東觀漢記曰車騎馬防以

前參藥勤勞省闢增封侯國襄城羹亭千二百五十戶即此又涇水逕陽縣北東逕不羹亭北背汝水于定陵城北入于汝此所謂東不羹也又汝水自西不羹城逕繁丘城東南過定陵縣北蓋二城本相近矣今許州襄城東南有西不羹城定陵故城在裕州舞陽縣北縣西北有東不羹城

# 潁尾

昭十二年楚子狩于州來次于潁尾杜註潁水之尾在下蔡西臣謹按潁尾潁水入淮處也

漢志潁水出陽城縣陽乾山東至下蔡入淮即其地矣亦謂之潁口水經注潁水過慎縣故城南又東逕蜩螭郭又東入于淮即春秋之潁尾又淮水過壽春縣西泚水洪水注之又東流與潁口會晉太元八年苻堅南下使苻雄引軍三十萬先至潁口陳大建五年吳明徹等攻壽陽齊將皮景和赴救屯于淮口久之壽陽為陳所拔齊將復至潁口胡氏曰景和自潁上出淮口即潁口也唐李希烈

阻兵淮西詔置淮潁水道楊子等院米皆自壽州入潁口宋紹興間金主南侵詔淮西諸軍保潁口

皆潁尾地也今在壽州西北四十里

中讐

昭十三年王奪鬬韋龜中讐杜註中讐邑名考闕

息舟

越大夫常壽過作亂圍固城克息舟城居之杜註息舟楚邑城之堅固者臣謹按國語禿姓

舟人則周既滅之韋昭註禿姓彭祖之別舟人國名路史曰舟人楚地越常壽過克息舟城居之

魚陂

公子比為王公子黑肱為令尹次于魚陂杜註竟陵縣城西北有甘魚陂臣謹按戰國策冷

向曰楚南有符離之塞北有甘魚之口水經注巾水出竟陵縣東西逕巾城下置巾水戍又西合楊

水謂之中口水而有古竟陵大城城傍有甘魚陂即左傳楚公子次于魚陂者也楊水又北注于沔

王氏曰戰國多用水攻故楚守  
甘魚之口今在景陵縣西北

訾梁

師及訾梁而潰或曰  
蓋梁名也在信陽州界

夏

見前  
夏納

棘闡

申亥求王遇于棘闡  
杜註棘里名闡門也

訾

葬子干于  
訾實訾教

宗丘

昭十四年楚子使然丹簡上國之兵于宗丘杜  
註上國在國都之西西方居上流故謂之上國

宗丘楚地或曰  
在荊州府歸州境

長岸

昭十七年楚人及吳戰于長岸杜註楚地臣  
謹按傳稱吳伐楚卜戰司馬子魚曰我得上流

何故不吉大敗吳師獲其乘舟餘皇杜註順江而下易用勝敵知為水戰也今太平府西南三十里有西梁山一名博望山與和州南七十里之東梁山夾江相對如門之闕亦曰天門山郡國志天門山一名蛾眉山春秋楚獲吳乘舟餘皇處也晉伐吳吳主遣將軍張象禦之于梁山象降王濬遂至建業宋孝建元年南郡王義宣叛宋主命柳元景等據梁山洲大明七年祀梁山大閔于江中立雙闕于山上陳霸先拒侯瑱遣侯安都立柵于梁山唐初輔公祏于梁山連鐵鎖斷江路蓋建康西偏之要地也或又謂金陵為古長岸地當時乘勝逐擊亦可至此或曰長岸長江之岸即長干也綿地甚遠太平之境亦可云長岸矣

白羽

見前析

下陰

昭十九年楚工尹赤遷陰于下陰杜註陰縣今屬南鄉郡臣謹按此所遷蓋即陰地之戎也

詳見晉地漢于此置陰縣屬南陽郡後漢因之建武三年延岑將鄧仲况擁兵據陰縣降于漢晉初屬南鄉郡後屬順陽郡宋屬廣平郡齊梁因之水經注沔水逕穀城東又南逕陰縣故城西故下陰也春秋遷陰于下陰是也魏時縣令劉熹葬生徒不終業而夭者百餘人號曰生墳西魏改陰縣曰陰城縣屬襄州唐省入穀城為陰城鎮宋復置又置光化軍治焉後軍廢改為光化縣元初屬南陽府後屬襄陽府今仍之縣西漢水西岸有古陰縣城即下陰城也西魏時遷于今治

郊

見鄭地

城父

見前

雞父

昭二十三年戰于雞父公羊穀梁俱作雞甫杜註雞父楚地安豐縣南有雞備亭臣謹按安

豐漢縣屬六安國三國魏分屬安豐郡晉仍之今壽州西南六十里有安豐故城雞備亭又在其城

南西

遠蒞

昭二十三年遠越縊于遠蒞杜註遠蒞楚地臣謹按舊承天府志京山縣境有遠蒞今堙

圉陽

楚子為舟師以畧吳疆及圉陽而還杜註圉陽楚地或曰應在無為州巢縣南境

州屈

茹

昭二十五年楚子使遠射城州屈復茹人焉城卽皇遷訾人焉使熊相謀郭巢季然

郭卷杜註還復茹人于州屈臣謹按路史黃帝封茹豐于楚地樂史曰五茹山在應城縣地名五

茹村或曰州屈在今鳳陽府附郭鳳陽縣西茹近淮小邑

丘皇

訾

見上杜註移訾人于丘皇或曰丘皇在今信陽州境訾見前

卷

見上杜註使二大夫為巢卷築郭也卷城在南陽葉縣南臣謹按後漢志葉有卷城今南陽有豐

水出衡山  
下逕卷城

潛

昭二十七年吳師圍潛杜註潛楚邑在廬江六縣西南臣謹按昭三十一年吳人侵潛六楚沈尹

戌帥師救潛吳師還楚遷潛于南岡即此漢置潛縣屬廬江郡晉因之劉宋為廬江郡治齊屬廬江

郡梁亦為廬江郡治東魏因之亦曰潛縣高齊時廢今霍山縣東北三十里有潛城南岡疑即漢置

縣處也地有潛山一名霍山一名天柱山史黃帝封五岳南岳衡山最遠以潛岳副之漢元封五年

冬巡南郡至江陵而東登禮瀟之天柱山號曰南岳

窮

昭二十七年楚左司馬沈尹戌與吳師遇于窮令尹子常以舟師及沙汭而還臣謹按水經注淮

水又東窮水入焉窮水出六安國安豐縣窮谷春秋吳救濞沈尹戌與吳師遇于窮谷是也流注決

水北灌安豐世謂之豐水流為陂謂之窮陂北注于淮淮水又東為安豐津司馬師討毋丘儉使諸

葛誕從安豐津先至壽春儉敗伏草中安豐都尉殺之安豐津都尉故城後立霍丘戌今窮水在霍

丘縣西  
南八里

沙汭

見上杜註沙水名臣謹按水經注潁水逕潁縣北別為沙爾雅曰潁別為沙郭璞曰大水

溢為小水之名猶江別為沱也又有夏肥水上承沙水逕城父縣右東為天淙陂分為二南為肥水

北為難水亂流東注俱入于淮其沙水合淮之處當即沙汭矣約在今霍丘縣境

養

昭三十年吳子使徐人執掩餘使鍾吾人執燭庸二公子奔楚楚子大封而定其徙使監馬尹大心

逆吳公子使居養莠尹然左司馬沈尹戌城之取于城父與胡田以益之杜註二子奔楚使逆之于竟養即所封之邑城城養胡田故胡子之地臣謹按今陳州沈丘縣東有養城是也杜註本不言養所在然他處註云城父屬譙郡汝陰西北有胡城譙郡今為亳州汝陰今為潁州沈丘與之逼近正在吳楚境上言養邑在此理可通矣再按楚有養由基疑其封邑亦在此水經注養水出魯陽縣北東歷永仁三堆又東逕沙川歷山符壘又東逕沙亭南故養陰里也郡國志襄有養陰里京相璠曰在襄城郟縣西南養水又東北入長迪湖合于汝今養陰里在郟縣或為由基所封也

南岡

見前

容城

定四年許遷于容城臣謹按應劭以漢華容縣為春秋時許所遷之容城非也漢華容縣在

今監利縣境後二年鄭滅許若在監利則逼近郢都鄭師安得至此或曰在今葉縣西

柏舉

定四年戰于柏舉楚師敗績杜註柏舉楚地臣謹按水經注舉水出龜頭山逕南梁定州治

合垂山之水又西南逕顏城又西逕齊安郡西又南歷赤亭下南流注于江江北岸烽火洲即舉洲

也春秋吳楚陳于柏舉京相璠曰漢東地夏有汜水或作舉疑即此也今麻城縣東六十里有龜岑

山山勢嵯峨上有白黑二龍井即舉水之源也一名龜頭山又縣東三十里有柏子山柏舉之名蓋

合柏山舉水而得元和志縣東南八十里有龜頭山即春秋時之柏舉也岩石洞壑種種奇勝唐太

宗常駐蹕于此

# 大隧直轅冥阨

定四年吳師自豫章與楚夾漢左司馬戌謂子常曰子沿漢而與

之上下我悉方城外以毀其舟還塞大隧直轅冥  
阨子濟漢而伐之我自後擊之必大敗之杜註沿  
緣也沿漢上下遮勿使渡也大隧直轅冥阨三者  
漢東之隘道又史皇曰若司馬毀吳舟于淮塞城  
口而入是獨克吳也杜註城三口三隘道之總名  
臣謹按三隘道冥阨為最著在汝寧府信陽州東  
南九十里湖廣應山縣北六十五里亦曰冥阨亦  
曰冥塞其地有大小石門鑿山通道實為險阨戰  
國策蘇代曰秦欲攻魏重楚則以南陽委于楚殘  
均陵塞龜阨楚人對頃襄曰涉龜塞而待秦之倦  
也又莊辛對楚襄曰穰侯受命于秦王填龜塞之  
內投已乎龜塞之外宋英謂春申君曰秦逾龜阨  
之塞而攻楚不便魏信陵君說安釐王曰秦伐楚  
道涉山谷行三十里而攻龜阨之塞所行甚遠所

攻甚難呂氏春秋天下九塞冥阨其一自魏晉以後冥阨之地常為南北重鎮所謂義陽有三關之塞也三關者一曰平靖關即左傳之冥阨也其關因山為障不營濠湟故以平靖為名一曰武陽關亦名澧山關即左傳之大隧也在信陽州東南一百五十里西南至德安府應山縣一百三十里地名大寨嶺薛氏云三關之險大寨嶺為平易是一曰黃峴關亦名百雁關又謂之九里關即左傳之直轅也在信陽州南九十里南至應山亦九十里義陽城與三關勢如首尾齊東昏侯永元三年軍主吳子陽等出三關侵魏敗還既而魏將田益宗謀取義陽欲以揚州之卒頓于建安捍三關之援梁天監三年義陽降于魏三關戍將聞之皆棄城走七年魏三關戍主侯登以城降梁八年魏元英取三關梁普通五年克三關進圍郢州不克自是三關得失不常侯景之亂三關為齊有南國之

勢益折而北矣當春秋時楚所恃以為國者申息之間方城之外扼要惟此也水經注潁水出大潰山逕賢首山西屈仁順城南故義陽郡治分南陽置者也本治石城因梁侵逼徙治此城魏置郢州也潁水又東逕義陽故城北是郡舊治對門有天井周一百餘步深一丈又東逕石城山即冥阨潁水又東逕七井岡又東北注于淮

大別

子常濟漢而陳自小別至于大別杜註禹貢漢水至大別南入江然則此二別在江夏界臣

謹按漢志六安國安豐縣禹貢大別山在西南鄭康成釋禹貢亦然皆誤也禹貢漢水過三澨至于大別南入于江孔安國傳云三澨水名入漢大別山名觸山迴南入江孔穎達曰吳既與楚夾漢然後楚乃濟漢而陳自小別至于大別然則二別近漢之名無緣反在安豐也地說曰漢水東行觸大

別之陂南與江合是已蓋安豐之大別更是一山  
與此無涉也今在漢陽府城東北百步漢江西岸  
江水逕其南漢水從西北來會之山之左即沔口  
水經注謂之魯山又謂之翼際山志曰山有魯肅  
祠因名地說云漢與江合于衡北翼際山傍水經  
注又云山上有吳江夏太守陸渙所治城江夏之  
名蓋取諸二水也沔左有却月城戴監軍葉故曲  
陵縣也後乃沙羨縣治江之右岸有船官浦歷黃  
鵠磯而南直鸚鵡洲之下尾黃鵠山林澗甚美譙  
郡戴仲若嘗隱此山東北對夏口城孫權所築也  
杜佑曰魯山三國南北朝為必爭之地桓振據江  
陵劉毅進討至夏口振遣其黨馮該守東岸孟仙  
圖據魯山城桓仙客守却月壘何無忌遏中流二  
城皆潰宋昇明初沈攸之討蕭道成出夏口據魯  
山蕭衍舉兵襄陽東昏侯使房僧寄守魯山以拒  
之衍自圍魯山魯山降郢城亦下陳天嘉初王琳

據江郢諸州附于魏齊人守魯山為聲援琳敗齊人棄城走陳因置魯山郡守之明年以郡賂周周以為重鎮大建十二年周司馬消難以魯山來降尋復為周所得隋末蕭銑置郢州于魯山唐武德四年其郢州刺史雷長穎以魯山來降于是江表悉定唐六典淮南道名山曰大別蓋大別世為荆楚要害如此

小別

見上臣謹按小別山在漢川縣南十里其形如甌亦名甌山東晉初王廙刺荊州為杜曾等

所扼退保甌山竟陵內史朱伺禦曾于揚口戰敗就廩于甌山即此歐陽志云梁天監中置甌山縣唐武德中改置沔州于甌山鎮蓋皆以山名孔穎達曰小別當在大別之東何則子常從小別與吳郢退而至大別明其自東而漸西也又曰五戰及郢謂濟漢而陳自小別而至于大別三戰也又戰

柏舉及清發共為五戰今以地形考之大別在漢陽小別在漢川柏舉在麻城漢川在漢陽之西北百七十里麻城在漢陽之東北與孔說正反蓋孔誤也左司馬誠子常曰子沿漢而與之上下蓋吳兵在漢北楚兵在漢南吳之兵鋒飄忽不定時方順漢東下而子常三與之遇既而知不可欲奔亦憚其行陣精整計欲退避所謂三戰亦不過披其戎壘未嘗大戰亦不言敗奔也至柏舉戰後吳從楚師乃敗奔而西矣再按漢初李左車為成安君畫策欲塞井陘口以困韓淮陰正與左司馬塞城口之計同子常能守其誠堅壁勿戰楚之取勝可以百全吳之去漢而陣于柏舉也或亦謀知楚謀內自沮懼求間道以為歸計乎觀夫槩王請戰而闔廬不許可以知之矣今麻城北去光州二百里其間有黃土等關當時度必有間道可通也存之俟考

清發

吳從楚師及清發杜註清發水名臣謹按水經注潁水過江夏安陸縣西又南逕石巖山北

亦謂之清水晉太安二年義陽蠻張昌作亂于其下龍綵鳳以惑衆鎮南將軍劉弘遣牙門將皮初與張昌戰于清水昌敗追斬于江夏即春秋時吳從楚師及清發者也今潁水在德安府附郭安陸縣西北石巖山在城西北八十里

雍澁

吳從楚敗諸雍澁五戰及郢臣謹按是年左司馬戌及息而還及吳師戰于雍澁五年吳師

敗楚師于雍澁亦即此水也孔穎達曰五戰不數為備故不數也今京山縣西南八里有澁水源出縣西七十里之磨石山下流合縣前河通于漢江或以為春秋時之雍澁又縣境有汭澁漳澁遠澁說者以為即禹貢之三澁皆與景陵接界今

亦湮  
亦曰滷湖再按岳州府東南五里有滄湖

睢

楚子涉睢杜註睢水出新城昌魏縣東至枝江縣入江是楚王西走臣謹按孔穎達曰睢地名睢

水出發河山在郢都之西楚王避吳而西走水經注曰沮水出漢中房陵縣西北景山發河山之

異名也東南流逕臨沮縣西青谿水注之又東南逕當陽縣北又南逕楚昭王冢王仲宣所謂昭丘

也又南與漢水合過枝江縣而入于江謂之沮口今當陽縣北一里有沮水相傳即楚昭王渡處晉

昌魏縣見前彭

雲中

見前夢中

稷定五年秦子蒲使楚人先與吳戰而自稷會之大敗夫槩王于沂杜註稷沂皆楚地或曰稷楚地

在今南陽府桐柏縣境

軍祥

遂射子從子西敗吳師于軍祥杜註楚地或曰在湖廣隨州西南

棠谿

夫槩王奔楚為棠谿氏臣謹按漢志汝南有吳房縣孟康曰吳房本房子國楚封吳夫槩于

此為棠谿氏以封吳故曰吳房今縣有棠谿亭是水經注濯水出汝南吳房縣吳房西北有棠谿城春秋時夫槩封于此後漢建武中又封泗水王鯀子燁為棠谿侯谿有白羊淵漢元封二年白羊出北淵畜牧者禱祀之濯水東流入瀕水今其地在汝寧府遂平縣西北百里又括地志棠谿縣故城在郾城縣西八十五里寰宇記棠谿城在郾城縣南二十五里又西平縣西北有棠谿村昔時產金甚精所謂棠谿之金天下之利也戰國策蘇秦曰韓之劍戟出于棠谿即此矣太康地記西平有龍

淵水淬刀劍特堅利漢志西平有鐵官蓋  
以此遂平西平鄆城三縣地本相接也

公壻之谿

吳師又敗于公壻之谿杜註楚地名臣  
謹按晉靈公時有公壻池之封蓋諸侯嫁

女于本國稱公壻  
猶之稱公子也

成臼

王之奔隨也將涉于成臼杜註江夏竟陵縣有  
白水出聊屈山西南入漢臣謹按水經注白

水出竟陵縣東北聊屈山一名盧屈山西流注于  
沔楚昭王濟于成臼即此也沔水又東過荆城東  
今在鍾祥縣東三十里志云白水舊流入漢川縣  
入沌水意白水不一處也今故道已堙縣有白口

驛猶以白水得名

脾洩

王在隨子西為王輿服國  
于脾洩杜註脾洩楚邑

負函

繒闕

哀四年楚人謀北方致蔡于負函致方

因為邑致之者會其衆也負函繒闕皆楚地臣

謹按少康二子長曰帝杼仲曰曲列少康崩帝杼

即位封曲列於繒是曰繒衍國語周史伯云申繒

豐

哀四年司馬起豐析與狄戎杜註析縣屬南鄉郡

鄉城今南鄉浙川縣有豐

少習

哀四年將通于少習以聽命杜註少習商縣武

曰武關楚通上雒阨道也春秋時蓋嘗為晉有以

其近陰地也穆公之世秦伐郿與楚爭商密商密

近武關地至是云將通于少習而杜釋之云將大  
開武關道是楚已得武關矣蘇秦說楚威王秦起  
兩軍一軍出武關一軍下黔中則鄢郢動矣楚懷  
王時秦請以武關之外易黔中地後紹懷王會武  
關執之以歸二世三年沛公南出轅轅畧南陽攻  
武關入秦漢三年韓生說漢王出武關軍于宛葉  
間武帝太初元年徙弘農都尉于武關晉永和七  
年桓溫伐秦步兵自浙川以趣武關敗秦軍于藍  
田義熙十二年劉裕伐秦遣沈田子等趣武關明  
年田子入武關進屯青泥姚泓來戰敗之東魏取  
荊州宇文泰遣獨孤信出武關攻東魏兵于淅陽  
後高歡遣高敖曹由武關趣商洛擊宇文泰唐建  
中時江淮輸貢為淮西李希烈所阻皆繇荆襄趣  
武關蓋自古以為險阨矣今繇河南之南陽湖廣  
之襄鄖入長安者必道武關自武關至長安四百  
九十里多從山中行過藍田治出險就平楚言將

通于少習以聽命若云  
將自此取晉河西地也

三戶

哀四年晉執蠻子與其五大夫以畀楚師于三戶杜註三戶今丹水縣北三戶亭臣謹按漢

桓帝河間孝王子博封三戶亭侯即此延熹四年博改封任城王蓋即故城置亭云今內鄉縣西南

有三戶亭晉丹水縣見卷首都

白

哀十六年子西召太子建之子勝于吳使處吳竟為白公杜註白楚邑今汝陰褒信縣西南有白亭


臣謹按史記楚惠王二年子西召勝于吳為巢大夫號白公是也巢今廬州府巢縣褒信縣東漢

置屬汝南郡晉屬汝陰郡元省今息縣東有白城東北七十里有褒信城

慎

哀十六年吳人伐慎白公敗之杜註汝陰慎縣也臣謹按漢置慎縣屬汝南郡後漢建武二年改

封究王賜為慎侯尋復為縣魏正元二年毋丘儉  
討司馬師不克自項走慎晉屬汝陰郡太和六年  
桓伊破秦苻堅于石橋秦兵退屯慎城宋改置慎  
縣于合肥縣境此城遂廢今鳳陽府潁上縣西北  
有慎城



春秋地名攷畧卷九

欽定四庫全書

經部

春秋地名考畧卷十一

詳校官監察御史臣劉湄

給事中臣溫常綬覆勘

總校官庶吉士臣倉聖脉

校對官助教臣羅萬選

謄錄貢生臣周培

欽定四庫全書

春秋地名攷畧卷十

詹事府詹事高士奇撰

宋

國於商丘

微子啟紂庶兄知紂必亡告父師少師而  
遜于荒野商書微子篇云我其發出狂我

家毫遜于荒是也後歸周武王封之于宋樂記云  
武王克殷既下車投殷之後于宋韓詩外傳語略

同又吕氏春秋武王立成湯之後于宋以奉桑林  
是也武王又封紂子武庚以續殷祀使管叔蔡叔

監之武王崩武庚畔成王誅之書序云成王既黜  
殷命殺武庚命微子啟代殷後作微子之命曰猷

殷王元子惟稽古崇德象賢統承先王修其禮物  
作賓于王家是也孔安國傳云命為宋公為湯後  
孔穎達云微子初封于宋不知何爵此時因舊宋  
命之為公令為湯後蓋向第封之而已以有武庚  
為嫡屬故未為湯後至是始主湯祀也其地則為  
商丘昭元年公孫僑對叔向曰昔高辛氏有二子  
伯曰閼伯季曰實沈居于曠林不相能也日尋干  
戈以相征討后帝不臧遷閼伯于商丘主辰商人  
是因故辰為商星是也殷之先相土嘗居之襄九  
年宋災晉侯問于士弱對曰古之火正或食于心  
或食于味味為鷄火心為大火陶唐之火正閼伯  
居商丘祀大火而火紀時焉相土因之故商主大  
火商人閼其禍敗之釁必始于火是也孔穎達云  
爾雅以大火為大辰昭十七年傳云宋大辰之虛  
是大火為宋星也殷本紀契生昭明昭明生相土  
相土契孫也以是言之則商丘本殷舊都武王因

以封微子耳臣謹按襄十年宋公享晉侯于楚丘  
請以桑林荀偃士句曰魯有禘樂賓祭用之宋以  
桑林享君不亦可乎莊子曰協于桑林之舞蓋桑  
林者宋人享祖廟之樂也又書傳言湯伐桀之後  
大旱七年湯禱于桑林之社而雨大至是桑林又  
實有其地乃呂氏春秋曰立湯後于宋以奉桑林  
又昭二十一年宋城舊鄆及桑林之門可見桑林  
即在商丘之境明矣廟社所在非舊都而何隱元  
年及宋人盟于宿始見于經杜氏釋例云宋商商  
丘三名一地梁國睢陽縣也睢陽秦縣于此置碭  
郡漢改為梁國縣如故梁孝王自大梁徙都于此  
漢書孝王築東苑方三百餘里廣睢陽城七十里  
後漢仍為國後魏改梁郡隋廢郡置宋州改縣名  
曰宋城唐初亦曰宋州建中時為宣武軍城五代  
唐改歸德軍宋太祖以歸德節度使受命景德二  
年升為應天府大中祥符七年建為南京城周十

五里四十步金曰歸德府復縣名曰睢陽元因之  
明初降為州省縣入州治嘉靖二十四年復為府  
置商丘縣為附郭今仍之故城圯于水弘治間少  
徙而北周九里城西南有商丘周三百步世稱闕  
臺再按僖六年許僖公見楚子面縛銜璧大夫  
衰經士與櫬楚子問諸逢伯對曰昔武王克殷微  
子啟如是武王親釋其縛受其璧而拔之焚其櫬  
禮而命之使復其位史記宋世家云武王克殷微  
子啟乃持其祭器造于軍門袒面縛左牽羊右  
把茅膝行而前以告武王乃釋微子復其位如故  
此因左傳之文而增飾之也孔穎達曰馬遷之書  
辭多錯繆面縛縛手于後故口銜其璧又安得左  
牽羊右把茅乎斯言當矣若傳言使復其位乃命  
許僖公者遷亦襲之夫微子新封宋國何云復位  
乎論語云微子去之即所謂遜荒矣面縛銜璧蓋  
古者有土之君力屈歸命之禮微子未嘗嗣世主

殷國又已避去直一逋播臣耳何為而行此禮乎  
當時逢伯獻諂謬為此說左氏直書彰其佞以戒  
後世原非實錄也茲不取再按服虔云相土居  
商丘故湯以為國號皆誤也商頌天命玄鳥降而  
生商鄭康成曰商國在太華之陽皇甫謐曰今上  
洛商縣是也孔穎達曰若契之居商即是商丘則  
契已居之不得云相土因閼伯若別有商地則湯  
之為商不是因相土矣傳言商主大火商即宋也  
昭八年魯蒐于紅草車千乘自根牟至于商衛哀  
二十四年饗夏對公曰周公武公娶于薛孝惠娶  
于商此謂宋為商之明驗故釋例曰商家一地  
是也商丘之名偶與初封同不必牽混可耳

**黃**

隱元年惠公之季年敗宋師于黃杜註陳留外黃  
縣東有黃城臣謹按今開封杞縣東北有外黃

城蘇代所謂決白馬之口魏無黃濟陽者也秦置  
外黃縣漢因之屬陳留郡唐初廢杜佑曰外黃縣

東有黃城兵亂之後城邑邱墟因曰黃墟晉太和四年桓溫伐燕慕容廆逆戰于黃墟敗走即此薛瓚曰外黃以黃溝而得名寰宇記睢州考城縣西三十六里有黃溝西距外黃城四里即魯惠公敗宋師處水經注河水舊

### 營

隱十年公敗宋師于管辛未取郛辛巳取防杜註管宋地臣謹按管無考或曰在單縣北境

### 郛

見上杜註濟陰成武東南有郛城臣謹按桓二年取郛大鼎于宋杜註郛國所造器也故繫名于

郛濟陰城武縣東南有北郛城蓋北郛為郛國又有南郛為宋邑也漢郛成縣屬山陽郡後漢省入

成武成武屬濟陰郡晉因之近志南郛城在北郛城南二里今兗州府城武縣東二十里有古郛城

詳見郛國防見魯地

老桃

隱十年公會齊侯鄭伯于老桃杜註宋地臣謹按戰國策高誘注曰任城有桃聚今濟寧城

北六十里有桃鄉城或云即其地

稷

桓二年會于稷以成宋亂杜註稷宋地

穀丘

桓十二年會宋公燕人盟于穀丘杜註穀丘宋地臣謹按本傳公欲平宋鄭及宋公盟于句

瀆之丘杜註即穀丘也漢濟陰郡有句陽縣應劭曰即句瀆之丘水經注濮水逕鹿城南又東與句

瀆會句瀆首受濮水枝渠逕勾陽縣故城南春秋之穀丘也左傳以為句瀆之丘縣處其陽故名今

在曹縣北三十里再按本義引張氏曰穀熟縣也今在歸德府東南四十里存之俟考

虛

桓十二年公會宋公于虛杜註宋地疑在睢州境

龜

桓十二年公會宋公于龜社  
註宋地疑亦在睢州境

盧門

桓十四年宋人以諸侯伐鄭以大宮之椽歸為  
盧門之椽杜註盧門宋城門臣謹按襄十七

年賊殺華吳于盧門合左師之後杜註後屋後昭  
二十一年華氏居盧門以叛杜註盧門宋東南城  
門後漢志睢陽有盧門亭宋城門之可考者又有  
揚門昭二十一年華向之亂公自揚門見公徒下  
而巡之杜註睢陽正東門名揚門禮檀弓元公入  
自揚門即此又有澤門襄十七年皇國父為太宰  
為平公築臺築者謳曰澤門之哲實與我役杜註  
澤門宋東城南門也皇國父白哲而居近澤門孟  
子曰魯君之宋呼于埳澤之門即此又有曹門成  
十八年鄭伯侵宋及曹門外杜註曹門宋城門又  
有桐門襄十年楚及鄭圍宋門于桐門又昭二十  
五年宋樂大心居桐門稱桐門右師哀二十六年

宋景公無子取公孫周之子得與啟畜諸宮公卒  
大尹立啟得夢啟北首而寢于廬門之外己為鳥  
而集諸其上味加于南門尾加于桐門曰余夢美  
必立杜註桐門北門又有蒙門襄二十七年宋公  
及諸侯之大夫盟于蒙門之外杜註蒙門宋城門  
又外城門曰桑林門昭二十一年宋城舊廊及桑  
林之門杜註舊廊故城桑林城門名又有廊門宋  
武公之世而班御皇父充石獲長狄緣斯宋公于  
是以門賞而班使食其征謂之廊門杜註門關門  
是也西門無名襄九年宋災祝宗用馬于四墉祀  
盤庚于西門之外水經注睢陽城西門即寇先鼓  
琴處先好釣居睢水旁宋景公問道不告殺之後  
十年止此門  
鼓琴而去

襄

桓十五年會于襄伐鄭杜註襄宋地臣謹按杜  
氏又曰沛國相縣西南有襄亭一名犖今相縣故

城在宿州南九十  
里袁亭在州西

蒙澤

莊十二年宋萬弒閔公于蒙澤杜註宋地梁國有蒙縣臣謹按蒙為宋邑故有蒙門國語陳

無字謂楚子宋有蕭蒙是也亦曰大蒙城漢置蒙縣屬梁國晉因之漢地里志蒙縣有獲水首受出東南逕彭城入泗水經注獲水出汭水亦兼丹水之稱竹書紀年曰宋殺其大夫皇緩于丹水之上又曰宋大水丹水壅不流蓋汭水之變名也獲水自蒙東山東逕長樂固北己氏縣南東南流于蒙澤十三州志曰蒙澤在縣東春秋宋萬與閔公爭博殺公于蒙澤即斯澤矣晉元嘉五年荀晞奉豫章王端屯蒙城置行臺後魏因之亦曰北蒙縣永安初梁將陳慶之送北海王顥北還拔蒙城至梁國蒙城即蒙城之訛矣後齊廢今歸德府治東北有蒙城再按水經注汭水自貫城逕蒙縣故城

南俗謂之小蒙城西征記城在泝水南十五六里  
莊周為蒙之漆園吏即此泝水又東逕大蒙城北  
麗氏謂自古不聞有二  
蒙疑此即蒙亳非是

**亳**

羣公子奔蕭公子御說奔亳杜註蒙縣西北有亳  
城臣謹按此北亳也亦曰蒙亳周書立政篇夷

微盧丞三亳阪尹孔安國曰亳人之歸周者有三  
所為之立監皇甫謐曰三處之地皆名為亳蒙為  
北亳穀熟為南亳偃師為西亳是也湯始興時蓋  
居蒙縣之亳仲虺之誥曰葛伯仇餉征自葛始孟  
子曰湯居亳與葛為隣漢地理志曰古葛國今梁  
國寧陵縣之葛鄉正與蒙亳相近也春秋皆為宋  
邑亦名薄僖二十一年楚會諸侯于孟執宋公以  
伐宋已而宋服公會諸侯盟于薄釋宋公哀十四  
年桓魋請以鞏易薄公不可曰薄宗邑也乃益鞏  
七邑是也漢置薄縣屬山陽郡臣瓚曰湯所都後

漢改屬梁國晉省今歸德府治西北有亳城穀熟之亳湯所遷也伊尹曰天誅造攻自牧官朕載自亳即此後漢封更始子歆為穀熟侯邑于此尋為穀熟縣屬梁國劉昭云有南亳帝王世紀曰湯都也括地志穀熟西南三十五里有南亳故城是也今穀熟故城在歸德府治東南四十里偃師之亳湯伐商時所居也書序自契至于成湯八遷湯始居亳從先王居孔安國曰契父帝嚳都亳湯自商丘遷焉故曰從先王居關駟曰亳本帝嚳之墟在禹貢豫州河洛之間今河南偃師城西二十里尸鄉亭是也鄭康成亦云今河南偃師縣有湯亭依此則偃師為西亳定矣八遷古無其目世本云契居商昭明居砥石相土居商丘與亳為四今益以南北二亳亦得六矣二亳皆在商丘境故曰自商丘徙也左傳椒舉對楚子云成湯有景亳之命而偃師有景山商頌曰景員維河殷受命咸宜乃言

商邑之形勢又曰陟彼景山松柏丸丸是斷是遷  
乃言高宗營立宗廟是則景亳之名因山而得尤  
不可移也春秋時為鄭地襄十一年同盟于亳城  
北即此唐高宗太子弘葬景山曰恭陵改山名太  
平山朱溫弑昭宗亦葬景山曰和陵今地志偃師  
縣西十四里有亳城又縣南二十里有景山餘詳  
周地鄭地中再按後漢志云梁國薄縣有湯冢  
皇覽云湯冢在濟陰亳縣東郭去縣三里當時成  
湯不知何以歸葬舊都乃諸家緣此遂指蒙縣之  
亳為景亳誤也漢建平二年案行水災因行湯冢  
劉向曰殷湯無葬處是諸家所言薄縣之冢亦未  
實又有言湯冢在扶風徵陌者再考史記水經注  
秦寧公二年伐湯三年與亳戰亳王奔戎遂滅湯  
皇甫謐曰周桓王時有亳王號湯非殷也徐廣曰  
亳王蓋成湯之後然則所謂徵陌之冢即其冢矣

蕭

見上杜註蕭宋邑今沛國蕭縣臣謹按是年傳宋萬弒閔公于蒙澤立子游羣公子奔蕭公子御

說奔亳南宮牛猛獲帥師圍亳冬十月蕭叔大心及戴武宣穆莊之族以曹師伐之殺南宮牛于師殺子游于宋立桓公杜註叔蕭大夫名後申無字對楚子曰宋蕭亳實殺子游即此事也與鄭京櫟並稱知為宋邑明矣莊二十三年蕭叔朝公穀梁傳微國之君未爵命者杜註蕭附庸國胡傳蕭叔附庸之君也汪氏曰中國附庸例書字廬陵李氏曰蕭叔穀梁以為名胡氏以入附庸書字之例正義曰蕭本宋邑宋桓公之立蕭叔大心有功焉宋人封之以為附庸夫大心為名則叔自應為字謂叔為名者疑與大心為兩人也當以胡氏為正蓋自是遂為國矣僖三十年介人侵蕭文十四年宋高哀為蕭封人以為卿杜註仕附庸還升為卿也宣十二年楚子伐蕭宋華椒以蔡人救蕭蕭潰遂

滅蕭十三年楚子伐宋以其救蕭也襄十年楚子  
囊鄭子耳伐我西鄙還圍蕭克之杜註蕭宋邑蓋  
楚人滅蕭而不能有還為宋邑也定十一年宋公  
之弟辰入于蕭以叛宋樂大心入于蕭傳曰大為  
宋患寵向魑故也十四年宋公之弟辰自蕭來奔  
戰國屬楚黃歇說秦王曰秦楚之兵構而不離魏  
氏將出兵而攻留方與鉅胡陵碭蕭相故宋必盡  
是也秦置蕭縣二世二年沛公與秦將司馬尼戰  
蕭西不利還引兵聚留漢二年漢王入彭城項羽  
自齊還至蕭晨擊漢軍漢蕭縣屬沛郡更始初封  
光武為蕭王即此後還屬沛國晉因之宋屬沛郡  
後魏為郡治後齊改為承高縣屬彭城郡隋屬徐  
州開皇六年改曰龍城縣十八年改曰臨沛縣大  
業初復為蕭縣唐仍屬徐州宋因之魏收志魏沛  
郡治蕭縣黃楊城或謂之北城城邑攷北城去南  
城二十里南城即故蕭國相傳蕭子避暑城也唐

以前縣治北城宋以後皆治南城明萬歷間圯于水遷治于三台山南麓古蕭城在縣西北十里

幽

莊十六年同盟于幽杜註  
幽宋地疑在考城縣界

梁丘

莊三十二年齊侯宋公遇于梁丘杜註梁丘在高平昌邑縣西南臣謹按穀梁傳曰梁丘在

曹邾之間去齊八百里張氏曰在濟州齊不以霸主自居以梁丘近宋而先之也水經注濟水分流

東北逕成武城西又東北逕梁山城西地志昌邑縣有梁丘鄉即春秋宋齊會處也又東北過乘

氏縣西而注河水括地志梁山城在成武縣東北三十二里成武今兗州府城武縣也縣東北三十

里有梁山晉昌邑縣在今兗州府金鄉縣西北四十里金鄉城武界相接也

榿

打榿

榿傳元年會于榿杜註榿宋地陳國陳縣西北有榿城臣謹按榿公羊作打左

傳會肇謀救鄭也杜註肇即檀地有二名范甯亦曰檀宋地後漢志陳縣有檀城王隱曰北有谷水

谷水今陳州西北有肇城

**貫**

傳二年齊宋江黃盟于貫杜註梁國蒙縣西北有貫城貫與貫字相似臣謹按公羊作貫澤范甯

云貫宋地後漢志蒙縣有貫城水經注汜水東至梁郡蒙縣又東逕貫城南俗謂之薄城非也關駟

以為貫城考文准地貫邑明矣貫城古貫國漢為蒙縣地元帝封梁敬王子為貫鄉侯晉仍屬蒙縣

隋開皇六年改置黃縣于此十八年改為蒙澤縣屬曹州大業初廢唐武德四年復置括地志貫城

今蒙澤城是也貞觀初縣廢舊志蒙澤城在濟陰縣南六十五里今在曹縣西十里

**多魚**

傳二年齊寺人貂始漏師於多魚臣謹按時為貫澤之盟蓋在宋境也或曰在今歸德府虞

城界

葵丘

傳九年會于葵丘杜註陳留外黃縣東有葵丘九月盟于葵丘臣謹按孔疏莊八年連稱管

至父戊葵丘杜云齊地在臨淄縣西桓公葵丘之會宰孔稱齊侯不務德而勤遠畧西為此會則此地遠處齊西不得近在臨淄故釋例以為陳留外黃屬之宋地後漢志外黃有葵丘聚齊桓公會此城中今考城縣東有葵丘漢有留縣東漢改名考城晉省後復置蓋地相接也

次睢之社

傳十九年宋公使邾子用鄆子于次睢之社杜註此水次有妖神東夷人皆祠之蓋

殺人而用祭臣謹按後漢志臨沂縣有叢亭博物志縣東界次睢有大叢社民謂之食人社今在

沂州境

鹿上

僖二十一年宋人齊人楚人盟于鹿上杜註宋地汝南有原鹿縣臣謹按東漢置原鹿縣屬

汝南郡為原鹿侯國晉屬汝陰郡後廢水經注汝水東南過汝南上蔡縣西又東南過平輿縣南又

東至原鹿縣南入于淮今潁州太和縣西有原鹿城再按水經注濮水自葭蜜東北經鹿城南即

春秋鹿上也疑誤

孟

僖二十一年宋公楚子會于孟杜註孟宋地臣謹按穀梁作雪公羊作霍杜氏曰襄邑西北有孟

亭哀二十六年宋大尹盟六子于唐孟即此今睢州有孟亭

薄

見前

泓

僖二十二年宋公及楚子戰于泓杜註泓水名處臣謹按寰宇記鄆城北里許有泓水即宋楚戰處

鄆城在今柘城縣北三十里

緡

邑僖二十三年齊侯伐宋圍緡杜註緡宋邑高平昌

十六年楚人伐宋圍緡即此古為緡國昭四年椒舉曰桀為仍之會有緡叛之十一年叔向曰桀克有緡以喪其國即此也漢置東緡縣建武十三年封馮異子彰為東緡侯晉有東緡入金鄉水經注濟水過金鄉縣南又東過東緡縣北故宋地春秋齊伐宋圍緡鄆衍曰余登緡城以望宋都者也今東緡城在兗州府金鄉縣東北二十里

孟諸

僖二十八年楚子玉為瓊弁玉纓夢河神謂已曰畀余余賜女孟諸之麋杜註孟諸宋藪澤水

草之交曰麋臣謹按禹貢導荷澤被孟豬孔安國傳荷澤在胡陵孟諸澤名在荷東北水沅溢覆

被之孔穎達曰地理志山陽有胡陵縣不言有荷  
澤又云荷澤在濟陰定陶縣東北孟諸在梁國睢  
陽縣東北以今地驗之則胡陵在睢陽之東定陶  
在睢陽之北其水皆不流溢被孟諸也然郡縣之  
名隨代變易古之胡陵當在睢陽之西北故得流  
溢被孟諸耳考水經注荷水分濟于定陶東北歷  
成武昌邑方與之境即禹貢漢濟東出于陶丘北  
又東至于荷也又云蕪荷澤被孟豬鬬曰不言  
入而言被明不常入也水盛乃覆被矣今荷澤在  
曹州東濟水自考城來會孔傳本無誤穎達意謂  
水不逆溢致生疑辨似過也周禮謂之望諸爾雅  
十藪宋有望諸丈十年宋公道楚子田于孟諸十  
六年宋昭公將田孟諸夫人王姬使帥甸攻而殺  
之昭二十一年宋司馬華遂與公謀逐華軀將使  
田孟諸而遣之哀十四年宋皇野語向巢迹人來  
告達澤有介麋馬杜註地理志達澤在開封縣東

北遠疑非孔穎達曰臣瓚案汲郡古文梁惠王廢  
達忌之數以賜民今浚儀有達忌陂宋都睢陽計  
去開封四百餘里非輕行可到故杜以為疑蓋于  
宋都之旁別有逢澤也或曰達猶遇澤即孟諸此  
說近是史記謂之明都今歸德府治東北有孟諸  
澤接虞城縣界又虞城縣北有孟諸臺故澤地也  
俗謂之湄臺即杜預所  
謂水草之交曰麋矣

承匡

文十年叔仲彭生會晉卻缺于承匡杜註承匡  
宋地在陳留襄邑縣西臣謹按秦為承匡縣

後以承匡地卑濕徙縣于襄陵城遂廢亦曰匡城  
襄陵即衛之襄牛宋曰襄陵秦置襄邑縣漢因之  
即今睢州治也詳衛地襄牛水經注渙水逕離邱  
故城南又東逕承匡城又東逕襄邑故城南故宋  
承匡襄牛之地宋襄公之所築故曰襄陵竹書紀  
年梁惠成王十七年宋景公衛公孫倉會齊師圍

我襄陵十八年惠成王以韓師師于襄陵齊侯使  
楚景舍來求成即此西有承匡城春秋會于承匡  
者也又谷水首受渙水于襄邑縣東東逕承匡城  
京相璠曰陳留襄邑縣西三十里有故承匡城今  
在睢州西三十里

長丘

文十一年初宋武公之世鄭瞞伐宋宋敗之于  
長丘杜註長丘宋地臣謹按漢地里志陳留

封丘縣孟康曰春秋傳敗翟于長丘今翟溝是近  
志翟溝在封丘縣南八里即白溝也音轉為翟西  
接黃河支流引瀆東入環帶縈紆澄澈如鑑一名  
滌溝一曰湛渠舊自陽武縣流入又東南經祥符

縣境  
今堙

而門

前見

新城

文十四年公會諸侯及晉趙盾于新城杜註宋地在梁國寧陵縣西臣謹按地理志云歸德

府商丘縣南  
有新城亭

大棘

宣二年宋華元鄭公子歸生戰于大棘杜註大棘在陳留襄邑縣南臣謹按水經注過水逕

陽夏縣西又東逕邈城北又東逕大棘城南故鄆之大棘城也即春秋宋鄭戰處後其地為楚莊所

并故園稱曰大棘有楚太子建墳伍員釣臺過水又東逕安平縣北陳留風俗傳曰大棘鄉故安平

縣也士人敦養易以統御後漢志已吾縣有大棘鄉漢景帝三年七國反吳楚共攻梁破棘壁即大

棘也今大棘城在寧陵縣西南七十里

沙隨

成十六年會于沙隨杜註沙隨宋地梁國寧陵縣北有沙隨亭臣謹按襄二十二年會于沙

隨錮樂氏也即此水經注汭水逕考城縣又東逕寧陵縣之沙陽亭北故沙隨國春秋會于沙隨謀伐鄭也世以為堂城汭水又東逕黃蒿塢續述征記曰堂城至黃蒿二十里其旁有白沙塢唐至德初張巡守雍丘以抗賊賊衆屯白沙塢巡乘夜襲擊大破之今寧陵縣西六里有沙隨城

洧陂

夫渠

洧陵

咸十二年鄭子罕伐宋宋將鉏樂懼敗諸洧陂退舍于夫渠不

傲鄭人覆敗諸洧陵獲將鉏樂懼杜註洧陂夫渠洧陵皆宋地臣謹按寧陵縣南二十五里有洧

陵城

彭城

咸十八年楚子伐宋宋魚石復入于彭城杜註彭城宋邑今彭城縣臣謹按堯封彭祖于彭

城號大彭氏國于此國語大彭為商伯是也春秋為宋地咸十八年楚伐宋拔之以納魚石公羊曰

封魚石也襄元年諸侯之師救宋圍彭城左傳曰  
非宋地追書也孔穎達曰謂楚以彭城封魚石既  
列為國非復宋地矣後彭城降晉史記楚共王拔  
宋彭城以封宋左師魚石四年諸侯共誅魚石而  
歸彭城于宋即此事又韓世家文侯二年伐宋至  
彭城執宋君秦置彭城縣屬泗水郡始皇二十八  
年自琅瑯還過彭城欲出周鼎泗水二世二年秦  
嘉立景駒為楚王軍彭城東既而楚懷王都此史  
記沛公項羽聞項梁軍破乃與呂臣軍俱引而東  
呂臣軍彭城東項羽軍彭城西沛公軍碭是也及  
項羽自立為西楚霸王亦都此漢三年漢王入彭  
城項羽西從蕭晨擊漢東至彭城大破漢軍孟康  
曰舊名江陵為南楚陳為東楚彭城為西楚文穎  
曰彭城故東楚也項羽都謂之西楚漢六年封弟  
交為楚王宣帝地節元年改為彭城國晉因之仍立徐州  
漢亦為楚國章帝改為彭城國晉因之仍立徐州

東晉嘗為重鎮再陷于石勒苻堅太元九年謝玄  
取之宋仍為徐州治又立彭城郡治泰始中沒于  
後魏自梁迄陳迭屬南北隋初置州後亦為彭城  
郡唐復為徐州後屢改為郡又置軍宋仍為徐州  
元因之省彭城縣入州屬歸德府旋升路又改為  
武安州明初復為徐州屬鳳陽府後直隸南京今  
屬江南省水經注曰城東北角  
起層樓號彭祖樓下有彭祖冢

朝郟

成十八年鄭伯侵宋遂會楚子伐宋取朝郟楚  
子辛鄭皇辰侵城郟取幽丘杜註朝郟城郟幽

丘皆宋地或曰朝郟在夏邑  
境城郟幽丘在徐州蕭縣界

城郟

上見

幽丘

上見

夷庚

西鉏吾曰今將崇諸侯之姦而披其地以塞夷庚杜註夷庚吳晉往來之要道臣謹按孔穎

達曰夷平也詩序云由庚萬物得由其道是以庚為道也此之以塞夷庚下云懼吳晉知謂塞吳晉

往來之道也蓋吳晉往來必由彭城故杜云然

台谷

靡角之谷

成十八年晉侯師于台谷以救宋遇楚師于靡角之谷杜註靡角宋

地臣謹按彭城之役晉楚遇于靡角之谷晉將遁矣雍子發命于軍將戰行歸者而逸楚圍楚師

宵潰晉降彭城而歸諸宋以魚石歸然則靡角之谷即近彭城地也或云台谷晉地彭城在永城界

似誤

虛打

成十八年同盟于虛打杜註地闕或云即宋之虛也

呂留

襄元年楚子辛救鄭侵宋呂留杜註呂留二縣今屬彭城郡臣謹按杜云二縣今謂彭城郡

有呂縣留縣即宋之二邑也漢呂縣屬楚國後漢及晉皆屬彭城國宋屬彭城郡後魏因之隋廢泗

水至呂城積石為梁故稱呂梁今呂城東十里呂梁洪上有二城一曰雲夢一曰梁王雲夢即韓信

梁王即彭越也今呂梁城在徐州北五十里中河分司駐焉留秦置縣二世元年秦嘉立景駒為

楚王在留張良遇漢高于此因封留侯尋亦為留縣屬楚國後漢屬彭城國晉因之宋仍屬彭城郡

泰始中沒于魏魏亦屬彭城郡水經注濟水過沛縣東北又東南過留縣北即春秋呂留也繁休伯

避地賦朝余發乎泗洲夕宿于留鄉是也後齊廢隋復置屬徐州唐廢今為運道所經

犬丘

襄元年鄭子然侵宋取犬丘杜註譙國鄴縣東北有太丘城迂迴疑臣謹按太丘地不近鄭

故杜以為疑然楚時楚方侵宋取呂留鄭蓋為楚  
取也漢為敬丘縣屬沛郡後漢曰太丘仍屬沛國  
陳實為太丘長即此晉縣廢城存東晉初祖逖自  
蘆洲進屯太丘是也今有太丘集在歸德府永城  
縣西北三十里與夏邑接界大河經此東北流入  
碭山境鄴縣漢屬沛郡晉屬譙郡唐廢鄴音嗟本  
作鄺非蕭何所封也

商丘

見卷首

訾毋

襄十年楚伐宋師于訾毋圍宋門于桐門杜  
註訾毋宋地或曰在歸德府鹿邑縣境

桐門

見前

楊梁

襄十二年楚子囊秦庶長無地伐宋師于楊梁  
杜註梁國睢陽縣東有地名楊梁臣謹按後

漢志睢陽有楊梁聚水經注渙水逕穀熟城南又東逕楊亭北即春秋楊梁也京相璠曰宋地今曰

陽亭俗謂之緣城非矣今在歸德府城東南三十里

合

襄十七年合左師臣謹按彭城古蹟志徐州沛縣有合鄉應誤漢志東海郡有合鄉縣東晉屬蘭陵郡北齊省入嶧縣近志合鄉在嶧縣西北晉滅

澤門

見前

蒙門

見前

商

見首卷

鬼閭

昭二十年宋八公子之徒與華氏戰于鬼閭杜註潁川長平縣西北有閭亭臣謹按今陳州

西華縣西南有閭倉城即古閭亭也曹魏築城置倉于此因改今名長平漢縣北齊省今故城在陳

州東六十里

南里

昭二十一年宋華亥向寧華定自陳入于宋南里以叛杜註南里宋城內里名臣謹按是年

傳華軀之臣張句劫華遂以叛召亡人華向樂大心等禦諸橫華氏居盧門以南里叛公子城大敗華氏圍諸南里華軀犯師以出食于睢上乃復入二十二年華亥向寧華定自南里出奔楚南里為城內近盧門地甚明穀梁傳曰宋之南鄙誤也

橫

見上杜註梁睢陽縣南有橫亭臣謹按今歸德府西南有橫城世謂之光臣

舊廊

見前

桑林之門

見前

厨

昭二十一年厨人濮杜註濮宋厨邑大夫

鴻口

昭二十一年齊師宋師敗吳師于鴻口杜註梁國睢陽縣東有鴻口亭臣謹按今歸德府東

有鴻口亭

楊門

新里

昭二十一年敗華氏于新里杜註新里華氏所取邑

赭丘

昭二十一年與華氏戰于赭丘杜註赭丘宋地臣謹按後漢志陳國長平縣有赭丘城長平

見前  
鬼閭

曲棘

昭二十五年宋公卒于曲棘杜註陳留外黃城中有曲棘里宋地臣謹按後漢志外黃有曲

棘里外黃城在今杞縣

老丘

定十五年鄭罕遠敗宋師于老丘杜註老丘宋地臣謹按今開封陳留縣北四十五里有老

丘城見陳留風俗傳

蘗蔭

定十五年鄭伐宋齊侯衛侯次于蘗蔭謀救宋也臣謹按公羊作蘗蔭左傳一名蘗蔭

雍丘

哀九年宋皇瑗取宋師于雍丘杜註雍丘縣屬陳留臣謹按杞封雍丘杞遷東國地屬宋後

屬魏雍一作難史記鄭世家繻公十五年韓景侯伐鄭取雍丘又秦蒙騫拔魏雍丘秦二世二年沛

公項羽自定陶西畧地破秦于雍丘曹參南攻雍丘擊李由軍破之漢置雍丘縣屬陳留郡晉屬陳

留國後魏置陽夏郡北齊因之隋初改置杞州尋廢州以縣屬梁郡唐初仍置杞州尋廢州以縣屬汴州五代晉改為杞縣漢仍為雍丘宋因之金復為杞縣今因之

# 城鉏

哀十一年衛太叔疾奔宋臣向魋納美珠焉與之城鉏杜註城鉏宋地臣謹按襄四年魏絳

曰昔有夏之方衰也后羿自鉏遷于窮石杜註鉏本國名即此城鉏也其後屬衛哀二十五年衛侯出奔宋適城鉏杜註城鉏近宋邑二十六年衛悼公立以城鉏與越人出公在城鉏以弓問子貢是也今大名府滑縣東十五里有鉏城見路史

# 戶牖

哀十三年會于黃池吳人囚子服景伯而還及戶牖歸之杜註戶牖陳留外黃縣西北東昏城

是臣謹按戶牖地秦屬陽武縣陳平陽武戶牖人也漢因封為戶牖侯後置東昏縣屬陳留郡相

傳秦始皇東游至此昏霧四塞不能進因名三國  
魏廢縣為鎮宋改置東明縣金又改置蘭陽縣今  
屬開封府東昏故城在蘭陽縣  
東北二十里有秦臺廢址存焉

鞏

哀十四年宋向魑請以鞏易薄杜云鞏向魑邑

逢澤

見孟諸

曹

哀十四年宋向魑入于曹以叛杜註哀八年宋滅曹以為邑

空澤連中

空桐

哀二十六年宋景公遊于空澤卒于連中大尹興空澤之士千

甲奉公自空桐入如沃官杜註空澤采邑連中館  
名梁國虞縣東南有空桐沃宮宋都內宮名臣  
謹按後漢志梁國虞縣有空桐寰宇記虞城縣東  
三十里有空桐山元和志虞縣南五里有空桐亭

晉虞縣北齊省隋復置  
虞城縣今屬歸德府

唐孟  
見前

陳

國於宛丘

史記陳胡公滿者帝舜之後也舜已崩傳禹天下而舜子商均為封國夏后之時或

失或續至于周武王克殷紂乃復求舜後封之于陳以奉帝舜祀襄二十五年子產曰昔虞閼父為周陶正以服事我先王我先王賴其利器用也與其神明之後也庸以元女大姬配胡公而封諸陳以備三恪杜註閼父舜後為武王陶正元女武王之女胡公閼父之子滿也周得天下封夏殷為二王後又封舜後謂之恪并二王後為三國孔穎達曰樂記云武王克殷未及下車乃封黃帝之後于

夏封帝堯之後于祀投殷之後于宋郊特牲云天子  
謂封二代之後猶尊賢也尊賢不過二代鄭玄以此  
與樂臣謹按呂氏春秋蒯作鑄祝作黎韓詩外傳  
武王封祝蒯陳以備三恪封夏後東樓公于杞紂  
子武庚于殷皆為上公是為二王之後蓋用鄭說  
而小變之也再考微子之命云統承先王修其禮  
物孔傳云言二王之後各修其典禮與時王並為  
三統詩振鷺序云二王之後來助祭也又有瞽篇  
云我客戾止永觀厥成鄭箋我客二王之後也皆  
不與陳並列也且言備三恪必先有二國而後以  
陳備之今祀宋之封乃在下車之後陳先已封矣  
安得反援杞宋而為三乎由是言之杜說舛矣陳  
之封地則在宛邱詩譜陳太皞伏羲氏之墟都于

宛丘之側其封域在禹貢豫州之東其地廣平無  
名山大澤西望外方東不及明諸武王妻嬀滿太  
姬太姬無子好巫覡禱祈鬼神歌舞之樂民俗化  
而為之班固曰太姬婦人尊貴好祭祀用史巫故  
其俗巫鬼陳詩曰坎其擊鼓宛丘之下無冬無夏  
植其鶩羽又曰東門之枌宛丘之柶子仲之子婆  
娑其下此其風也爾雅陳有宛丘毛傳四方高中  
央下曰宛丘隱三年衛莊公娶于陳曰厲嬀始見  
于傳杜註陳今陳國陳縣昭八年楚滅陳以穿封  
戌為陳公十三年楚復封陳獲麟後三年復滅陳  
楚頃襄王徙都之號郢陳秦屬潁川郡陳勝于此  
自立號張楚漢置陳縣又置淮陽國治此後漢改  
陳國晉屬梁國劉宋置陳郡于項縣省陳縣入之  
後魏因之隋復于故陳縣地置宛丘縣為陳州治  
唐宋因之明初省附郭宛丘縣入州州城南三里  
有宛丘高二丈又州城內東北隅有池即詩所謂

東門之池也 再按史記舜為庶人時堯妻之二女居于滿汭其後因為姓姓媯氏武王求舜後得媯滿封之于陳誤也世本曰舜姓姚氏哀元年少康逃奔有虞為之庖正虞思于是妻之以二姚邑諸綸杜註虞舜後諸侯思有虞君也虞君自以二女妻少康姚虞姓是也又昭八年史趙曰自幕至于瞽瞍無違命舜重之以明德寘德于遂遂世守之及胡公不淫故周賜之姓使祀虞帝杜註幕舜之先瞽瞍舜父從幕至瞽瞍間無違天命廢絕者遂舜後蓋殷之興存舜之後而封遂胡公遂之後事周武王賜姓曰媯封諸陳紹舜後孔穎達曰虞思猶姓姚至胡公周賜姓為媯耳史遷妄也再按孔穎達曰魯語幕能師顓頊者也 有虞氏報馬孔晁曰幕能修道功不及祖德不及宗故每于歲之大烝而祭焉謂之報明幕是舜先但不知去舜遠近也觀傳此文瞽瞍以前似有國土而尚書序

云虞舜側微孔安國云為庶人故微賤蓋瞽瞍始失國耳臣再按鄭語史伯曰有天地之大功者其子孫必章虞幕能聽協風以成樂物生者也夏禹能單平水土以品處庶類者也商契能和合五教以保于百姓者也周棄能播殖百穀疏以衣食民人者也其後皆為王公侯伯幕之功德至於禹稷契並稱又曰虞幕曰虞舜曰虞思一氏相傳其為有國明矣孔氏云至瞽瞍而失國殆不可易至韋昭云虞幕即舜後虞思謬極

### 前封虞

虞思傳見上杜註梁國有虞縣綸虞邑孔穎達曰堯典有鰥在下曰虞舜又曰釐降二

女于媯汭嬪于虞皇甫謐曰嬪于虞因以虞為氏虞今河東大陽縣西山上虞城是也然則舜有天下之號曰虞本因河東大陽之虞及周之興封仲雍之後為虞國即彼地矣舜既禪禹禹封舜後為

諸侯未必封于河東虞地而梁國有虞縣疑是夏時虞國也戰國時為虞邑史記漢王敗于彭城還軍碭西過梁地至虞是也漢置虞縣屬梁國晉因之後魏屬沛郡改曰蕭縣北齊省隋置虞城縣屬宋川唐武德四年置東虞州州旋廢仍屬宋州五代梁屬輝州宋仍屬宋州金廢元復置屬東平路後屬濟寧路明初屬歸德府嘉靖九年以水患徙今治故城在縣南三里又縣西三十五里有綸城即夏時綸邑後漢志虞縣有綸城

### 又封遂

莊十三年齊人滅遂杜註遂國在濟北蛇丘縣東北臣謹按十七年齊人滅于遂傳齊

滅遂使人戍之遂之遺民飲使者酒而殺之齊人滅焉穀梁曰遂微國襄三年晏子謂叔向曰箕伯直柄虞遂伯戲其相胡公大姬已在齊矣杜註四人皆舜後胡公四人之後八年傳舜重之以明德

于寘寘遂杜以為殷所封孔穎達曰遂在直柄之  
後故曰殷封也傳又曰遂世守之知周時尚存特  
微不克振耳胡公自以選建明德而封如夏後有  
越仍封杞也或難之曰商所封國至周猶有存焉  
者乎曰奚但商封薛越夏所封也然則遂為舜後  
杜氏何以不言曰鑄為黃帝後厲為神農後焦為  
堯後杜皆不言而後人言之蓋杜以過慎而畧者  
多矣路史曰舜後封于遂為齊所滅是也今兗州  
府寧陽縣西北  
十里有遂鄉

# 濮

隱四年衛人殺州吁于濮杜註濮陳地水名臣  
謹按水經濮水出河南密縣大鵬山劉澄之永初  
記云濮水也注云是水首受谿水川渠雙引俱東  
注有洧與之過沙枝流脉亂互相通稱是以春秋  
昭九年遷城父人于陳以夷濮西田益之京相璠  
云以夷之濮西田益也杜預亦言以夷田在濮水

西者與城父人服虔曰濮水名也蓋與北濮迥別矣  
又南逕鍾亭宛亭又南逕胡城今潁陰縣

也或曰濮在今陳州北境蓋即濮水之說

焦夷

傳二十三年楚伐陳遂取焦夷杜註焦今譙縣也夷今譙郡城父縣二地皆陳邑臣謹按襄

元年晉以東諸侯之師伐陳遂侵楚焦夷即此蓋其時已屬楚矣焦本焦國武王封神農之後于焦

既屬楚改為譙秦置譙縣陳勝初起攻譙下之是也漢亦為譙縣屬沛郡後漢建武四年幸譙仍屬

沛國曹操生長于譙自言于譙東五十里築精舍欲春夏讀書秋冬射獵建安中往往治兵于譙以

擊孫權曹丕篡位改建五都譙其一也數如譙議南侵明帝睿亦常至焉晉仍為譙郡治永昌初陷

于石勒永和五年復歸于晉升平三年没于慕容燕太和四年桓溫克譙晉末縣廢而譙城如故劉

宋亦置譙郡又僑置小黃縣為陳留郡治後魏因之隋初陳留郡廢大業三年改小黃為譙縣譙郡

治焉唐宋皆為亳州治間改郡置軍亦尋罷明初以附郭譙縣省入州今仍之夷城父見楚地

壺丘

文九年楚侵陳克壺丘杜註壺丘陳邑或曰在今陳州南境

厥貉

文十年楚子蔡侯次于厥貉杜註闕或曰在陳州項城界

辰陵

宣十一年楚子陳侯鄭伯盟于辰陵穀梁作夷陵杜註潁川長平縣東南有辰亭臣謹按水

經注洧水逕茅城又東南逕辰亭俗謂之田城非也春秋盟于辰陵京相璠曰長平有故辰亭今此

城在長平西北而杜以為東南疑有誤長平漢縣屬汝南郡後漢屬陳國晉屬梁國今在陳州西六

里十

栗門

宣十一年楚子入陳殺陳夏徵舒轅諸栗門杜註栗門陳城門

鳴鹿

成十六年知武子以諸侯之師侵陳至于鳴鹿杜註陳國武平縣西南有鹿邑臣謹按陳鳴

鹿漢為靳鄆縣地屬沛縣東漢析置武平縣屬陳國劉昭曰春秋侵陳鳴鹿即此晉因之後改屬梁

國魏屬陳留郡隋改為鹿邑縣屬陳州唐屬亳州中和三年宣武帥朱全忠與黃巢黨戰于鹿邑敗

之遂入據亳州宋以後因之明改屬歸德府古鹿邑城在縣西南宋白云在縣西十三里志云縣東

北有武平故城後漢置縣治此建安元年封曹操為武平侯此其食邑云

大冥

哀六年吳伐陳楚昭王救陳攻大冥卒于城父杜註大冥陳地吳師所在或曰在今陳州項

境城縣

蔡

國於上蔡

史記蔡叔度文王子武王弟武王克殷封叔鮮于管封叔度于蔡二人相紂子武庚

祿父治殷遺民武王崩成王少周公旦專王室管叔蔡叔疑周公之為不利于成王乃挾武庚以作亂周公旦承成王命誅武庚殺管叔而放蔡叔蔡叔度既遷而死其子曰胡周公言于成王復封胡于蔡此蔡國始封之說也書蔡仲之命曰惟周公位冢宰正百工羣叔流言乃致辟管叔于商囚蔡仲于郭鄰以車七乘降霍叔于庶人三年不齒蔡仲克庸祗德周公以為卿士叔卒乃命諸王邦之蔡王若曰小子胡惟爾率德改行克慎厥猷肆予命爾侯于東土定四年祝鮀曰管蔡啟商基間王室王于是乎殺管叔而蔡蔡叔以車七乘徒七十人其子蔡仲改行帥德周公舉之以為己卿士見

諸王而命之以蔡其命書云王曰胡無若爾考之  
違王命也蓋用蔡仲之命而小損益之孔安國書  
傳云郭鄰中國之外地名管蔡國名明王之法誅  
父用子言至公周公圻內諸侯二卿治事叔之所  
封圻內之蔡仲之所封淮汝之間圻內之蔡名已  
滅故取其名以名新國欲其戒之孔疏云周禮冢  
宰以八則治都鄙建其長立其兩馬鄭皆云立卿  
兩人是畿內諸侯立二卿書言以仲為卿士左傳  
言為己卿士是為周公圻內之卿士也仲封淮汝  
之間左傳有文叔封圻內其事不知所出又云蔡  
蔡叔上蔡字素達反本作槃說文云槃散之也從  
米殺聲放散之義故訓為放隸書改作致失字體  
隱四年陳蔡方睦于衛杜註蔡今汝南上蔡縣即  
孔傳所謂淮汝之間也史記世家漢地里志並云  
叔度封上蔡孔疏別引杜預云武王封叔度于汝  
南上蔡至平侯徙新蔡昭侯徙居九江下蔡蓋釋

例之丈穎達雖以汝南去京師遠不得在圻內為  
疑未有以易之也臣謹按管霍與蔡同時封號三  
監管在河南霍在河東皆非圻內蔡不得獨為圻  
內霍叔降黜三年而復之名封不異于舊蔡豈必  
獨異于舊乎周召初封圻內不過采邑封魯封燕  
乃為大國叔以罪廢其子乃更封大國無是理也  
循是以推蔡亦祇應復其舊國孔傳所云存疑可  
也春秋時亦稱上蔡竹書紀年魏章帥師及鄭師  
伐楚取上蔡亦謂之蔡陽秦昭襄三十三年客卿  
胡傷取魏蔡陽孔氏曰蔡城在蔡水之陽也漢因  
置上蔡縣應劭曰以九江有下蔡故稱上蔡後漢  
安帝封鄧騭為侯邑晉仍屬汝南郡後魏為汝南  
郡治隋初郡廢縣屬蔡州大業初改置汝陽縣而  
改武津縣為上蔡縣屬汝南郡唐屬蔡州宋因之  
明屬汝寧府故蔡國城在縣西南十里輿地志云  
古蔡國在汝陽上蔡二縣界又上蔡縣東十里有

蔡國再按史記蔡世家云周公舉胡以為魯卿士魯國治于是周公言于成王復封之于蔡此誤也孔穎達駁之云魯世家言成王封周公于魯周公不就封留佑成王則周公身不至魯安得使胡為魯卿士馬遷之謬說耳

### 遷於新蔡

昭十一年楚滅蔡使公子棄疾為蔡公子廬

歸于蔡是為平侯二十年蔡侯廬卒漢地理志新蔡縣蔡平侯徙此當在此時也然其事不見于經傳惟釋例嘗言之漢置縣屬汝南郡光武封吳漢為侯邑曹魏分屬汝陰郡晉惠帝分立新蔡郡劉宋因之蕭齊置北新蔡郡後魏仍為新蔡郡東魏兼置蔡州高齊州廢改為廣寧郡隋初又改為舒州及廣寧縣尋改縣為汝縣大業初州廢復曰新蔡縣唐初仍置舒州于此貞觀初州廢縣屬豫州

後屬蔡州宋因之金屬息州元省入息州洪武四年復置改屬汝寧府今仍之宋忠云蔡仲胡居

下蔡誤

又遷州來

哀元年楚子圍蔡蔡人男女以辨使疆于江汝之間而還蔡于是乎請遷于吳杜註

楚欲使蔡徙國于江水之北汝水之南楚既還蔡人更叛楚就吳二年吳洩庸如蔡納聘而稍納師師畢入衆知之蔡侯告大夫殺公子駟以說哭而遷墓冬蔡遷于州來杜註元年蔡請遷于吳中悔故因聘襲之將遷與先君辭故哭此昭侯遷國之事也州來即下蔡詳見楚邑宋忠云平侯遷下蔡誤孔穎達云服虔曰蔡使楚進疆于故江國與汝水之間其意言蔡欲割地以賂楚也乃襄七年申無字曰文王作僕區之法所以封汝又哀十七年彭仲爽申俘也文王用為令尹封畛于汝是

也。王時竟已至汝水，不待此時進疆。汝水也。且江國汝水不可共文，故杜不取其說。

莘

莊十年，荆敗蔡師于莘。杜註：蔡地。或曰：在今汝寧府汝陽縣境。

桑隧

咸六年，晉師侵蔡，楚公子申、公子成以申息之師救蔡。禦諸桑隧。杜註：汝南朗陵縣東有桑里。

在上蔡東南。臣謹按：朗陵，漢縣，屬汝南郡。晉因之，在今汝寧府確山縣西南三十五里。又縣東有

桑里亭

鄖陽

昭十九年，楚子在蔡。鄖陽，封人之女奔之，生太子建。蓋在今新蔡境。

邢

國於邢

史記：成王封周公旦子靖淵為邢侯。襄十二年，傳曰：凡蔣邢茅胙祭，臨于周公之廟。蓋魯

人聞諸國之喪各以族屬遠近臨之此為尤親也  
其地在河北殷祖乙遷都於邢世紀邢侯為紂三  
公忠諫被誅即此隱五年石碣殺州吁衛人逆公  
子晉于邢始見于經五年曲沃莊伯以鄭人邢人  
伐翼杜註邢國在廣平襄國縣閭元年狄伐邢齊  
人救邢二年齊桓公遷邢于夷儀僖元年齊師曹  
師城邢十八年狄人盟于邢二十五年衛侯燬滅邢  
成二年晉人以屈巫為邢大夫杜註晉邑蓋衛取  
邢地又入于晉也蔡聲子曰子靈奔晉晉人與之  
邢以為謀主即此事昭四年司馬侯曰衛邢無難  
狄亦滅之十四年晉邢侯與雍子爭鄆田哀四年  
齊國夏伐晉取邢任欒郕諸邑既而邢復入于晉  
戰國為趙邑趙孝成王造檀臺以朝諸侯謂之信  
都秦滅趙置信都縣秦末趙王歇都此項羽使張  
耳都之改為襄國蓋取趙襄子謚為名漢亦為襄

國縣屬趙國後漢因之晉屬廣平郡石勒改為建  
平城後趙錄石勒由石門進據襄國後擒劉曜盡  
得關隴乃僭號建平大修城郭徙洛陽翁仲銅馬  
各二列于永豐門謂其城曰建平城冉閔滅趙劉  
獻復稱帝于襄國晉永和八年閔攻滅顯毀其城  
是後襄國廢入任縣魏太和二十年復改置襄國  
縣屬北廣平郡隋改為龍岡縣置邢州治焉龍岡  
者石趙佛圖澄掘地得死龍咒之騰空直上故以  
為名歷唐宋間置郡軍旋廢大率皆曰邢州宋宣  
和二年改曰邢臺縣元屬順德府尋改路明復為  
府今仍之古襄國城在府治西南北齊武平初有  
掘古冢得銅鼎受五六升銘曰邢侯夫人姜氏今  
其冢猶在  
邢臺境

夷儀

見上杜註夷儀邢地臣謹按夷儀公羊作陳  
儀衛人滅邢之後夷儀為衛地襄二十四年諸

侯會于夷儀將以伐齊水不克二十五年復會于  
夷儀以伐齊會莊公弑齊人請成晉許之是年衛  
獻公在齊晉侯逆之將使衛與之夷儀秋衛侯入  
于夷儀杜註夷儀本邢地衛滅邢而為衛邑晉愍  
衛衎失國使衛與之一邑二十六年衛侯衎復歸  
于衛左傳曰書復歸國納之也杜註本旨納之夷  
儀今從夷儀入國嬖若晉所納故曰國納之按哀  
二十四年子貢對衛出公曰獻公孫于齊子鮮子  
展為夷儀之盟而君入即此事也然二子盟國人  
于夷儀不見正傳當以此條推之又定九年齊伐  
晉夷儀為衛討也十年晉伐衛報夷儀也則又為  
晉地蓋寶衛之邊邑與齊皆連壤也杜佑通典龍  
岡縣百五十里夷儀嶺即邢國所遷有夷儀城俗  
謠為隨宜城窠字記夷儀山在邢州西北百五十  
九里今順德府西百四十里有夷儀城再按劉  
昭曰聊城有夷儀聚後漢之初范升為聊城令保

于夷儀即此今在東  
昌府西南十二里

聶北

見上杜註聶北邢地臣謹按水經注聊城西  
二十五里有古聶邑蓋即晏子所謂聊攝以西

也寰宇記聶城在博平縣西南  
二十五里今在東昌府西北

春秋地名攷畧卷十

欽定四庫全書

春秋地名攷畧卷十一

詹事府詹事高士奇撰

秦

國於西垂

國語曰嬴伯翳之後也史記秦之先伯翳佐禹平水土賜姓嬴氏後有大駱生非子

非子居犬丘為周孝王主馬汧渭之間分土為附庸邑之秦號曰秦嬴詩譜曰秦隴西谷名徐廣曰

天水隴西縣有秦亭今秦州清水縣故秦城是也又史記秦嬴三傳秦仲厲王無道西戎反王室滅

犬丘大駱之族宣王時秦仲死于戎宣王命其子莊公為西垂大夫居其故西犬丘生襄公周室東

遷襄公以兵送周平王平王封襄公為諸侯生文  
公文公東獵至汧渭之會曰昔周邑我先秦嬴于  
此卜居之占曰吉即營邑之文公立四十四年為  
魯隱公元年入春秋臣謹按世紀秦襄公二年  
徙居于汧或以為即漢之汧縣似誤也史記秦本  
紀不載襄公徙都兩漢地志亦不言汧縣嘗為秦  
都又秦紀後載秦史遺文云襄公立饗國十二年  
初為西時葬西垂生文公文公立居西垂宮五十  
年死葬西垂封禪書秦襄公既侯居西垂自以為  
主少皞之神作西時祠白帝其後十六年秦文公  
東獵汧渭之間卜居之後九年文公獲若石于陳  
倉北阪城祠之間以一牢祠命曰陳寶然則文公始  
營汧渭之間亦未嘗定居故卒而仍葬于西垂襄  
公之未嘗徙都益可知矣又詩小戎序云美襄公  
也乃云在其板屋孔氏曰天水隴西氏以板為屋  
然則秦之西垂民亦板屋也依此則襄公居西垂

又明甚水經注汧水出五色魚謂之蒲谷鄉弦中谷決  
之為弦蒲藪其水出五色魚謂之魚龍川東逕汧  
縣故城北秦文公東獵汧田遂都其地蓋指世紀  
所云汧縣之都易襄為文稍與史合然史稱汧渭  
之會而此邑即今隴州反在汧源之上去渭甚遠  
猶未確也今寶雞縣東北有陳倉古城二城相連  
一為秦文公所築一為魏郝昭所築又有陳倉山  
一名雞峯山即文公獲陳寶處又其地在汧水之  
南渭水之北正所云汧渭之間也又漢志陳倉有  
羽陽宮秦武公所起武公者文公之孫也非以大  
父所嘗居而益增營構耶辛氏三秦記秦武公都  
陳倉城即是說矣近志隴州東南二十五里有故  
秦城或以為即非子始封之邑此又即牧馬汧渭  
之事文公所稱周邑我先秦嬴于此者也其以文  
公汧渭誤為襄公汧縣益昭昭可見矣但  
文公原未定居茲故從秦史繫之西垂

# 遷於平陽

史記文公五十年卒葬西山子瑯公之長子立是為寧公寧公二年徙居平陽是為

魯隱公九年也秦史遺文云靜公不享國而死生憲公憲公饗國十二年居西新邑死葬衙生武公

德公出子出子饗國六年居西陵庶長弗忌威累參父三人率賊賊出子鄆衍葬衙武公立武公饗

國二十年居平陽封官葬宣陽聚東南以史遷文協之靜公即瑯公憲公即寧公西新邑即平陽西

陵者出子之封邑蓋初遷時未有定名故謂之新邑至武公始謂之平陽耳漢為鄆縣地水經注沂

水逕隃麋縣故城南歷慈山郁夷縣逕平陽故城南秦寧公徙此徐廣曰故鄆之平陽亭也太平真

君六年改置平陽縣屬武都郡以鄆縣併入焉西魏復改曰鄆城縣後周廢入周城縣隋改周城為

渭濱尋復為鄆縣元升州明仍為縣屬鳳翔府今仍之縣西四十六里有平陽古城括地志岐山縣

有平陽鄉鄉內有平陽聚金志號縣有平陽鎮皆  
指此蓋歷代幅員分隸不一故也後周周城縣本  
置于今岐山縣境後徙于今都  
縣治自隋至今無改于舊矣

# 又遷於雍

史記德公元年初居雍城大鄭宮祠廊時  
卜居雍後子孫飲馬于河時魯莊公十七

年也先是桓四年秦師圍魏執芮伯以歸秦始見  
經是為秦寧公徙平陽後七年也僖十三年秦輸  
粟自雍及絳相繼杜註雍秦國都昭元年秦后子  
享晉侯造舟于河十里舍車歸取酬幣終事八反  
杜註雍絳相去八百里其地孔穎達曰周初為名  
穆公之采邑有名亭水經注雍水東逕邵亭東世  
謂之樹亭以幽王之難地陷于戎史記曰平王東  
徙賜襄公岐以西之地曰戎無道侵奪我岐豐之  
地秦能攻逐戎即有其地與誓封爵之襄公十二  
年伐戎至岐卒文公十六年伐戎敗走于是文

公遂收周餘民有之地至岐岐以東獻之周蓋自  
是地屬於秦矣乃詩譜云秦襄公橫有周西都宗  
周畿內八百里之地東至迤山在荆岐終南惇物  
之野又小戎序云襄公備其兵甲以討西戎西戎  
方彊而征伐不休終南序云美襄公能取周地受  
顯服是襄公已有之未知孰是文公雖未徙雍即  
已經營之封禪書文公夢黃虵自天下屬地其口  
止于鄜衍文公問史敦敦曰此上帝之徵于是作  
鄜畤自未作鄜畤而雍旁故有吳陽武時雍東有  
好畤皆廢無祠或曰自古以雍州積高神明之隲  
故立時郊上帝諸神祠皆聚蓋黃帝嘗用事雖晚  
周亦郊焉作鄜畤後七十八年德公都雍有鳳臺  
秦穆公時有蕭史者善吹簫能致白鵠孔雀穆公  
女弄玉好之公為作臺以居之一旦隨鳳去又史  
記秦宣公作密畤于渭南靈公作吳陽上畤祠黃  
帝作下畤祠炎帝獻公徙居櫟陽作畦畤自獻公

徙後秦君亦時來居雍班固云孝公起橐泉宮惠  
公起祈年宮昭王起咸陽宮皆在雍也後置雍縣  
史記上郊見雍嫪毐發卒攻斬年宮漢初曹參攻  
雍即此漢亦曰雍縣屬右扶風漢二年高祖曰故  
秦時上帝祠何帝也對曰四帝有白青黃赤帝之  
祠高祖曰吾聞天有五帝而止四何也莫知其說  
高祖曰吾知之矣待我而五也乃立黑帝祠命曰  
北時秦四帝謂酈時密時吳陽上下時皆在雍者  
其好時別立縣畦時在櫟陽不得與也孝文十三  
年增雍五時路車各一乘駕被具武帝八年上至  
雍郊見五時至成帝時用諸儒議作長安南北郊  
匡衡言雍酈密上下時本秦侯各以其意所立非  
禮之所載于是雍郊始罷魏晉雍縣屬扶風郡後  
魏太延二年為平秦郡治隋為扶風郡治唐肅宗  
至德二載改縣曰鳳翔置鳳翔郡尋升府建為西  
京興京兆成都太原河南為五京又析置天興縣

寶應元年省鳳翔入天興宋因之金大定十九年  
改天興為鳳翔縣今為鳳翔府治古雍城在城南  
又有五峙原括地志云在雍縣南獻公徙櫟陽後  
孝公徙咸陽遂代周有天下櫟陽在今臨潼縣咸  
陽即今咸陽縣皆屬西安府秦好時縣在  
今乾州再按漢志云惠王居雍大謬

靈臺

僖十五年秦獲晉侯舍諸靈臺杜註在京兆鄠  
縣周之故臺臣謹按括地志辟雍靈沼今悉

無復處惟靈臺高二丈周回一百二十步今西安  
府鄠縣東五里有鄠宮又東二十五里有靈囿圓

中有  
靈臺

王城

僖十五年晉侯及秦伯盟于王城杜註馮翊臨  
晉縣東有王城今名武鄉臣謹按僖二十四

年晉文公歸國潛會秦伯于王城成十一年秦晉  
為成將會于令狐秦伯不肯涉河次于王城史記

厲共公十六年壘河旁以兵二萬攻大荔取其王城徐廣曰今之臨晉也臨晉有王城厲共公在春秋末蓋地失于戎而秦復取之也括地志王城大荔戎城是矣今在西安府朝邑縣西臨晉城在朝邑縣西二里縣道記云秦築壘以臨晉地故名

# 具囿

傳三十三年鄭皇武子曰鄭之有原圃猶秦之有具囿也杜註原圃具囿皆囿名臣謹按秦詩

駟鐵美襄公有田狩之事園囿之樂其詩曰遊于北園四牡既閑輶車驚鑣載獫狁馵是也具囿蓋亦苑囿之名穆公都雍具囿必在祈年橐泉之間自後如文之蒨陽昭之棫林襄之芷陽皆離宮也至始皇而築長楊射熊謂之上林賈山謂其自咸陽而西至雍離宮三百苑囿益廣矣

# 彭衙

文二年戰于彭衙杜註郃陽縣西北有彭衙城臣謹按秦紀秦寧公出子皆葬衙裴駘曰馮

翊有衙縣史記秦武公元年伐彭戲氏至于華山  
正義彭戲戎號也即彭衙秦文公嘗于其地置泉  
縣漢改置栗邑及衙縣屬左馮翊東漢初鄧禹破  
更始將公乘歙于衙即此皇覽曰衙有倉頡冢在  
利陽亭南見後漢志安帝永和五年以上郡羌亂  
寄理衙縣晉省入栗邑縣後魏廢栗邑尋改置白  
水縣今仍之縣東北六十里有彭衙古城郃陽今  
仍為縣亦在白水東晉省衙地入栗邑杜預時蓋  
其古城割屬郃陽也縣道記衙城  
側有彭衙水南流至縣東南入洛  
汪文二年晉伐秦取汪及彭衙而還汪或曰在澄  
城縣界或曰在白水縣界再按史記晉襄公三  
年秦使孟明伐晉取晉汪以歸索隱據左傳文二  
年孟明伐晉敗于彭衙無取汪之事其冬先且居  
伐秦取汪彭衙是秦邑止可云晉取  
秦汪何言秦取晉汪也史記定誤

邠

杜註四年晉侯伐秦圍邠新城以報王官之役

新城

見上臣謹按即梁國之新里也秦取之謂之新城詳見梁地戰國策秦昭王時段干越人說

秦新城君秦之公子也新城是其食邑今澄城縣東北二十里有古新城

剗首

文七年晉敗秦于令狐至于剗首已丑先蔑奔秦士會從之杜註從剗首去也令狐在河東當與

剗首相接臣謹按杜氏又云剗首坑在郃陽也水經注漢水在郃陽城南東流于河與剗首水相

近今在同州郃陽縣東南

少梁

文十年晉人伐秦即少梁臣謹按即梁國也見小國

河西

文十三年秦伯師于河西魏人在東杜註今河北縣于秦為在河之東臣謹按此河西在今

同華二州之境河自龍門而南至華而東晉在西  
河之東南河之北而太行遶其東所謂表裏山河  
者秦初起岐雍未能以河為境晉強遂跨河而滅  
西虢兼舊鄭以汾澮為河東故以虢略華陰為河  
西僖九年秦穆公援立夷吾夷吾請割河外列城  
五史記作河西八城既而背約不與即此也韓原  
之戰卜徒父筮之曰涉河益秦人所心艷而不得  
者惟此其後晉獻河西地秦始征晉河東置官司  
焉然不久仍為晉有少梁北徵彭衙剗首之爭皆  
在此矣三家分晉地入于魏自晉文公初霸攘白  
翟開西河魏得之為西河上郡史記魏築長城自  
鄭濱洛以北有上郡武侯嘗浮西河而下所謂美  
哉山河之固者也秦孝公初立下令曰穆公東平  
晉亂以河為界往者屬蹠簡公出子之不寧三晉  
奪我河西地先君獻公圖復之寡人思之嘗痛于  
心不敢忘于是出兵東圍陝城十二年東地渡洛惠

王六年魏始納陰晉八年魏納河西地十年魏納  
上郡十五縣陰晉今華陰縣河孔氏曰同丹之  
州丹州今宜川縣上郡今延安以北由是河西之  
地盡入于秦呂氏春秋吳起去西河而泣曰使畢  
我能秦必可亡西河可以王賈生曰商君佐之拱  
手而取西河之外惠王武王蒙故業因遺策秦無  
亡矢遺鏃之費而天下諸侯已  
困矣蓋西河之繫于秦晉如此

# 麻隧

咸十三年晉師及秦師戰于麻隧秦師敗績師  
遂濟涇及侯麗而還迂晉侯于新楚臣謹按

晉世家厲公三年與諸侯伐秦至涇陽縣西南  
麻隧即此事也麻隧或云在今涇陽縣西南

# 涇

見上杜註涇水出安定東南徑扶風京兆高陸縣  
入渭也臣謹按襄十四年晉帥諸侯之師伐秦

及涇不濟叔孫穆子賦匏有苦葉叔向退而具舟  
濟涇而次秦人毒涇上流師人多死即此漢志涇

水出開頭山東南至陽陵入渭過郡三行千六十  
里開頭山在今平涼府西南三十里曰涇谷其水  
東流經涇州長武邠州淳化永壽又南歷醴泉之  
谷口又東南過涇陽至高陵縣西南十里合于渭  
水漢陽陵在今高陵縣高陵即高陵也涇水至涇  
陽有五渡曰花池曰米村曰狄道曰臨涇曰雕城  
寰宇記曰雕城渡即諸侯濟涇秦人毒涇上流處  
漢唐之通津也津口有橋曰涇橋秦始皇初水工  
鄭國為鑿涇水自中山西邸瓠口為渠並北山東  
注洛三百餘里溉漑鹵之地四萬餘頃收皆畝一  
鍾漢太始二年趙中大夫白公復奏穿渠引涇水  
首起谷口尾入櫟陽注渭中袤二百里溉田四千  
五百餘頃民歌之曰田于何所池陽谷口鄭國在  
前白渠起後涇水一石其泥數斗且溉且糞長我  
禾黍蓋秦人  
所仰給也

侯麗

見上杜註秦地臣謹按劉伯莊云侯麗在涇陽縣境路史與盟會圖皆云麗與驪通即驪戎

國始皇二十五年置麗邑今在臨潼境或疑侯麗近此未知孰是

新楚

見上杜註秦地或云在朝邑縣境

械林

襄十四年晉師伐秦至械林杜註械林秦地臣謹按械林即舊鄭咸林也詩譜宣王封母弟

友於宗周畿內咸林之地國語韋昭註云鄭武公為司徒食于咸林系本云桓公居械林徙拾杜

預謂之舊鄭隱十二年鄭莊公曰吾先君新邑于此杜註舊鄭在京兆是也宋忠曰械林與拾皆舊

鄭地戰國屬魏魏丈侯十七年西攻秦至鄭而還秦昭王十一年初置鄭縣漢屬京兆後漢晉仍之

後魏置華山郡兼置華州自是或為郡或為州至元始定為華州明省附郭鄭縣入之屬西安府縣

道記云古城有官道經其中東西相連有三小城  
宇文周移縣于西南九里隋初又移于州北唐興  
元中築羅城古鄭城在其內即今治也再按是  
年左傳諸侯之師及涇不濟鄭子蟜衛北宮懿子  
勸之濟濟涇而次鄭司馬子蟜帥鄭師以進師皆  
從之至于棧林不獲成焉史記秦景公十八年晉  
悼公敗秦軍追度涇至棧林而還即此事也則濟  
涇而後至棧林棧林之地宜在涇水西乃今涇陽  
之境非華州矣既又思之涇水至高陵合于渭自  
是涇渭合流歷渭南至華州又歷朝邑華陰而入  
于河二水相合古人每得通稱如涑水入易易亦  
可謂之涑漢水入潁潁亦可謂之漢涇渭皆大水  
宜得通稱也以此言之諸侯所涉不過在同華之  
間涇口之下流更進而後及于棧林耳又是役也  
諸侯皆不欲進復以軍帥不和不及取成而退晉  
人謂之遷延之役安得涇入敵境而至于涇陽乎

然則寰宇記所云睢城  
渡之說要亦未可信矣

# 中南

昭四年司馬侯曰荆山中南九州之險也杜註  
在始平武功縣南臣謹按禹貢雍州終南惇

物秦風終南篇毛氏傳終南周之名山終南也東  
方朔曰南山天下之阻也南有江淮北有河渭其

地從河隴以東商洛以西厥壤肥饒班固云鄠杜  
竹林南山檀柘號為陸海唐一行曰天下山河之

象存乎兩戒而終南分地絡之陰陽柳宗元曰據  
天之中在都之南西至于褒斜又西至于隴首以

臨于戎東至于商顏又東至于太華以距于關元  
和志南山西接岐州東抵陝號其谷之大者有五

曰子午谷斜谷駱谷藍田谷衡嶺谷也括地志終  
南山一名南山一名橘山一名楚山一名秦山一

名周南山一名地肺山今終南山在西安府南五  
十里亘鳳翔岐山郿縣武功藍屋鄠縣長安咸寧

藍田之境

吳

始居梅里

史記吳太伯太伯弟仲雍皆周太王之子而王季歷之兄也季歷賢而有聖子昌太

王欲立季歷以及昌于是太伯仲雍乃奔荆蠻文身斷髮示不可用以避季歷季歷果立是為王季

而昌為太王太伯之奔荆蠻自號勾吳荆蠻義之從而歸之千餘家吳越春秋古公病二子託名采

藥衡山遂之荆蠻古公卒二子歸赴喪畢還荆蠻國民君而事之太伯曰吾以伯長居國絕嗣者也

其當有封者吳仲也故自號勾吳荆蠻義之太伯起城周三里二百步外郭三百餘里在西北隅名

曰故吳人民皆耕田其中史記又曰太伯無子弟仲雍立三傳周章是時武王克殷求太伯仲雍後

得周章周章已君吳因而封之而封周章第虞仲  
于周之北故夏墟是為虞仲列為諸侯世本曰吳  
孰哉居藩籬宋忠曰孰哉仲雍字此吳國始立之  
說也宣八年楚人疆舒蓼及滑汭盟吳越始見于  
春秋杜註吳國今吳郡孔穎達曰太伯自號句吳  
句或為工夷言發聲也武王因封其曾孫周章于  
吳為吳子臣謹按國語董褐復命于吳曰命主  
有命固曰吳伯不曰吳王韋昭注曰命主受賜主  
之冊命周禮伯執躬圭依此則吳為伯爵矣吳子  
乃春秋之書法恐非本爵也其立國之地為梅里  
穎達又曰太伯居梅里傳至十九世孫壽夢壽夢  
卒諸樊南徙吳至二十一世孫光使子胥築闔閭  
城都之即今蘇州也吳地記泰伯築城于梅李平  
墟周三里二百步外郭周三百餘里其地漢為無  
錫縣地有歷山春申君世祠以牛東漢為無錫侯  
國劉昭曰皇覽言太伯冢在吳縣北梅里聚去城

十里誤也昭案無錫縣東皇山有太伯冢去墓十里即舊宅井猶存晉屬毘陵郡杜氏襲漢志吳縣為太伯所都故曰吳國今吳郡梅里故都畧而不道恐未然矣唐志無錫南五里有泰伯墳杜氏通典無錫太伯所居今無錫縣東南三十里有泰伯城地曰梅李鄉亦曰梅里村城東五里有皇山一名鴻山再按僖五年宮之奇曰太伯虞仲大王之昭也太伯不從是以不嗣杜註不從父命俱讓適吳孔穎達曰太伯虞仲與季歷若有嫡庶不須相避相避知其同母也周本紀云古公有長子曰太伯次曰虞仲太姜生季歷似為別母史遷之繆耳

遷於姑蘇

後漢志吳本國註引越絕書吳大城闔閭所造周迴二百一十步二尺杜氏通典蘇

州吳國之都也自闔閭以後並都于此城邑考周敬王六年闔閭築大城周四十二里三十步小城

八里二百六十步開陸門八以象天之八風水門  
八以象地之八卦其名皆子胥所制東曰婁曰匠  
西曰閭曰胥南曰盤曰蛇北曰平曰齊吳都賦通  
門二八水道六衢是也地有姑蘇山因曰姑蘇吳  
語申胥曰今王變鯨禹之功高高下下以疲民于  
姑蘇史記閭廬十五年越伐吳敗之姑蘇越絕書  
閭廬起姑蘇臺三年聚材五年乃成高見三百里  
子胥諫夫差不聽曰吾見麋鹿遊于姑蘇之臺也  
國語越伐吳吳師潰吳王帥其賢良與其重祿以  
上姑蘇范蠡擊鼓興師至于姑蘇之宮遂滅吳是  
也閭門孫權記注曰以天門通閭闔也一曰破楚  
門門外有閭閭冢曰虎丘越絕書盤郢魚腸之劍  
在焉墓之三日白虎居其上故曰虎丘胥門以路  
當姑胥山而名即姑蘇山也蛇門以在國之已位  
而名吳越春秋夫差赦越王歸國送之于蛇門之  
外史記子胥曰扶吾目懸吳東門以見越之入吳

也孔氏曰鱣門也亦曰鱣門似即蛇門矣匠門亦曰干將門即闔閭使干將鑄劍處婁門以道出婁江而名亦曰嚠門齊門以齊女女吳而名也吳亡地入越越滅入楚以封春申君黃歇史記春申君城故吳墟以自為都邑孔氏曰今蘇州也又于城內小城西北別東城以居嫌破楚門名不美改為昌門秦置吳縣為會稽郡治漢初以封荆王賈都吳後屬吳王濞景帝三年仍為會稽郡治後漢永建四年分置吳郡晉宋因之杜佑曰吳郡吳興郡陽三郡為三吳也隋改蘇州自唐歷宋間改吳郡不久旋罷仍為蘇州宋置平江軍政和三年升平江府元改府為路明曰蘇州今仍之吳郡城隋楊素嘗徙橫山唐武德間復故今止六門門名大率因吳之舊惟平門匠門蛇門不復存鱣門則改為對門也俗訛為富門繞城河水為吳之錦帆涇姑蘇山在城西三十里臣謹按申胥謂夫差疲民

于姑蘇韋昭曰姑蘇臺名非也姑蘇臺闔閭所起  
不始于夫差也蓋姑蘇為吳國都之地名于其境  
內多所營築所謂高高下下也後越伐吳吳王率  
其賢士重祿以上姑蘇猶夫越樓會稽耳安有棄  
其國都而走保一臺乎觀後范蠡  
入姑蘇之官遂滅吳則可以知矣

鳩茲

襄三年楚子重伐吳克鳩茲至于衡山杜註鳩茲吳邑在丹陽蕪湖縣東今阜夷也臣謹按

杜註阜夷輿地志作阜慈今蕪湖縣東四十里有  
鳩茲港即此也漢蕪湖縣屬丹陽郡以地卑蓄水

嘗生蕪藻因名孫權使陸遜屯兵于此先主嘗謂  
權曰江東形勢先有建業次有蕪湖後漢因之晉

咸和四年為豫州治寧康初僑立上黨郡及襄垣  
縣寄治蕪湖尋省蕪湖入襄垣宋齊因之屬淮南

郡隋省襄垣入當塗唐為蕪湖鎮武德七年李孝  
恭破輔公祐于蕪湖進拔其梁山等鎮大順中陽

僱復置蕪湖縣屬昇州宋屬宣州太平興國中改屬太平州明屬太平府今仍之古蕪湖城在縣東

三十里

衡山

見上杜註在吳興烏程縣南臣謹按烏程今湖州府附郭縣也府南十八里有橫山山形橫

亘古謂橫為衡或以為太遠今太平府當塗縣東北六十里永保鄉有橫山似為較近

淮上

襄三年晉侯使荀會逆吳子于淮上臣謹按淮水出桐柏縣胎簪山東流由楚地入吳境又

東入于海成十八年楚取彭城西鉏吾曰塞夷庚謂彭城為吳晉往來之道也則此淮上當在臨淮

泗州之境

善道

襄五年會吳于善道杜註地闕臣謹按善道公羊穀梁皆作善稻范甯云吳地穀梁傳吳謂

善伊謂稻緩號從中國名從主人註云夷狄所號  
地形及物類當從中國言之故不言伊緩而言善  
稻人名當從本俗疏云如左氏云壽夢之鼎也阮  
勝之南兖州記云盱眙本吳善道地秦置盱眙縣  
項羽尊楚懷王為義帝都盱眙漢屬臨淮郡郡都  
尉治焉武帝封江都易王子蒙為侯邑許慎曰張  
目為盱舉目為眙城居山上可以矚遠故曰盱眙  
後漢屬下邳國晉為臨淮郡治義熙中置盱眙郡  
宋因之魏主燾南至瓜埠歸過盱眙太守沈璞敗  
之隋廢郡縣屬揚州唐宋初皆屬楚州後屢改屬  
南宋為招信軍亦時廢為縣元嘗為  
臨淮府尋罷為縣屬泗州至今因之

臯舟之隘

襄十四年楚公子貞伐吳吳人自臯舟之  
隘要而擊之杜註臯舟吳險阨之道或

曰水淺滯舟之處  
非地名也

朱方

襄二十八年慶封奔吳吳句餘與之朱方聚其族而居之杜註句餘吳子夷昧也朱方吳地

臣謹按昭四年楚靈王使屈甲圍朱方克之即此顏師古曰漢丹徒縣吳朱方也杜佑通典丹徒古

朱方後名谷陽秦始皇時其地有天子氣始皇使赭衣徒三千鑿京峴以敗其勢因名丹徒漢置縣

屬會稽郡景帝三年吳王濞亡走保于江南丹徒後漢建安十三年孫權徙鎮于此因京峴山為名

號曰京鎮尋移秣陵使孫何鎮焉吳嘉禾三年改縣名武進晉太康二年復故大興初以晉陵郡及

丹徒縣並治京口志曰因山為壘俯臨江津故曰京口劉宋為南徐州治隋開皇九年分道伐陳賀

若弼自廣陵出京口大業初廢州并廢縣入延陵尋置延陵鎮于此唐復曰丹徒潤州治焉有孫氏

所築子城特堅完號鐵甕建中初置鎮海軍乾符末周寶為潤帥築羅城其東南門曰朱方門存吳

舊也南唐亦為重鎮宋仍曰潤州改軍名鎮江以  
徽宗潛邸升軍為府元改路明初曰江淮府後曰  
鎮江府自唐迄明皆以  
丹徒為附郭今仍之

延陵

襄三十一  
年趙文子問曰延州來季子其果立  
乎杜註延州來季札邑臣謹按昭二十七年

使延州來季子聘于上國杜註季子本封延陵後  
復封延州來故曰延州來哀十年吳延州來季子救  
陳公羊傳襄二十九年季子去之延陵何休曰延  
陵吳下邑越絕書諸樊將死命弟餘祭曰必及季  
札乃封季札于延陵謂之延陵季子蓋吳時即有  
延陵之名其稱延州來者省文也漢置毘陵縣屬  
會稽郡班固曰季札所居師古曰舊延陵漢改之  
後漢屬吳郡晉初因之後改屬毘陵郡東海王越  
世子毘食采毘陵没于石勒元帝命少子哀王冲  
嗣之為諱毘改縣曰晉陵遂為晉陵郡治隋廢郡

置常州唐宋因之元為路明為府今仍之唐置武進縣與晉陵俱附郭明初并晉陵入武進越絕書毘陵上湖中冢季子冢也名延陵墟皇覽曰季子冢在暨陽鄉杜氏通典季札墓在今縣北七十里申浦之西再按杜佑通典潤州有延陵縣晉太康中分曲阿之延陵鄉立之有季札祠非古之延陵古延陵今晉陵縣是孔子所書季子碑歲久湮沒開元中明皇勅殷仲容摹刻大歷十四年潤州刺史蕭定重刻之延陵鎮由是世人知有潤州之延陵不知常州延陵矣

房鍾

昭六年楚令尹子蕩伐吳吳人敗其師于房鍾杜註吳地或曰在今壽州蒙城縣界

槁李

定十四年於越敗吳于槁李杜註吳郡嘉興縣南醉李城臣謹按槁李公羊傳作醉李越絕

書作就李國語句踐之境北至于槁李然則與闔廬戰時吳王夫差增越封西至于槁李然則與闔廬戰時

越境猶未能至。檇李，檇李當為吳地矣。嘉興，春秋時為長水地。秦置由拳縣，水經注：谷水出吳小湖，逕由拳故城。神異傳：秦時長水縣也。始皇時陷為谷，因名谷水。吳記：谷中有城，即卷縣治。始皇惡其勢使囚十萬人，汙之，故曰囚倦，故就李鄉，即檇李之地也。漢亦曰由拳，屬會稽郡。班固曰：故就李鄉。吳越戰地，應劭曰：古之檇李也。後漢屬吳郡。孫吳改嘉禾，又改嘉興。晉因之。隋、唐屬蘇州。杜氏通典：吳國南百四十里，與越分境。昔吳伐越，越子禦之于檇李，則今嘉興縣之地也。檇李城在今嘉興縣南三十七里。宋為秀州，後以孝宗潛邸升嘉興府。嘉興縣為附郭，今仍之。志云：檇李城在嘉興縣南四十五里，谷中。

涇

闔閭卒于涇  
去檇李七里

夫椒

夫椒袁元年吳王夫差敗越于夫椒報攜李也杜註

記夫差二年選精兵伐越敗之夫椒報姑蘇也又越王句踐棲吳王于夫椒即此也賀循曰包山西

北曰夫椒通典包山一名夫椒山即西洞庭山也在太湖中左思吳都賦云指包山而為期集洞庭

而淹留郭璞曰太湖中有包山洞穴潛行水底無所不通即林屋洞矣志云周迴百三十五里地占

三鄉居民數千家不異市邑隋滅陳吳州刺史蕭瑄據州不下兵敗保包山宋置角頭寨今距蘇州

府西南八十五里或云夫椒山在無錫縣西北四十里一名湫山瀕太湖與馬跡山相近似誤再

按是役傳云報攜李也夫謂之報則舉兵者吳而夫椒為吳地且在近郊不應于此敗越史記曰句

踐聞夫差日夜勒兵且以報越欲先吳未發往伐之范蠡諫不聽遂興兵吳王悉發精兵擊越敗之

夫椒越王乃以餘兵五千入保棲于會稽吳王追而圍之可以補左氏之未備

邳溝

哀九年吳城邳溝通江淮杜註于邳江築城穿溝東北通射陽湖西北至末口入淮通糧道也

今廣陵邳江是臣謹按國語夫差使王孫苟告勞于周曰子沿江沂江關溝溪水出于商魯之間吳越春秋吳將伐齊自廣陵關江通淮越絕書百尺瀆奏江吳以達糧三國吳嘉禾三年分道伐魏遣將軍孫韶等入淮向廣陵淮陰又太平二年孫峻使文欽等自江都入淮泗以圖青濟蓋皆即此邳溝矣歷南北朝道出江淮必由此隋開皇七年將伐陳于揚州開山陽瀆以通漕大業元年以邳溝水道屈曲發民濬治自山陽至揚子入江渠廣四十步所謂隋通邳溝也今為邳江亦曰合瀆河亦曰漕河亦曰官河起于揚州府城東南二里歷邳伯湖高郵湖寶應湖北至黃浦接淮安界為山

陽潰自江達淮南北長三百餘里宋天禧中張綸  
為江淮發運使因隋堤之舊而增築之長二百里  
為十閘以洩橫流曰平水閘政和中斗門水挿增  
至七十九座蓋自邵伯以北地勢西高而東卑高  
寶諸湖周數百里受天長七十餘河之水非堤堰  
無以節宣之永樂中平江伯陳瑄言湖漕不堤與  
無漕同湖隄弗開與無隄同置閘之法欲密欲狹  
密則水疏無漲滿之患狹則勢緩無蓄決之虞湖  
溢則洩以利隄湖落則閉以利漕誠石畫也射陽  
湖一名射陂一名博支湖在淮安府東南七十里  
長三百里漢廣陵王胥有罪其相勝之奏奪王射  
陂是也故時邳溝由此入淮其合淮處曰末口在  
淮安府北五里後人于此立堰曰北神堰周顯德  
五年周主自將兵攻楚州齊雲艦大阻北神口不  
得度即此宋雍熙中自楚州抵淮陰開河六十里  
以避山陽灣之險永樂中陳瑄鑿清江浦引邳溝

繇管家湖鴨陳口以入淮自是漕運皆由淮安城  
西而城東之故道廢北神堰不復治而射陽湖亦  
淤塞矣邦溝城寰宇記云在揚州西四里蜀岡上  
漢後已荒圯謂之蕪城胡三省曰魏曹丕所登廣  
陵故城即  
蕪城也

橐臯

哀十二年會吳于橐臯杜註在淮南遂道縣東  
南臣謹按漢橐臯縣屬九江郡後漢省孟康

曰橐臯音拓姑三國魏黃初四年曹仁南侵使其  
子泰攻濡須自將萬人留橐臯為後援吳五鳳二  
年孫峻謀襲壽春自東興進至橐臯是也唐曰橐  
臯鎮宋紹興十一年烏珠陷廬州以屯兵拓臯為  
劉錡等所敗橐訛為拓又訛為拓今巢縣西北六  
十里有拓臯鎮俗名會吳城漢浚道縣屬九江郡  
晉曰遂道屬淮南郡齊梁後廢其故  
城在今廬州府東與巢縣相接壤

鄖

廣陵海陵縣東南有發繇口  
哀十二年公會衛侯宋皇瑗于鄖杜註鄖發陽也

會吳于鄖公及衛侯宋皇瑗盟而卒辭吳盟吳人  
藩衛侯之舍子服景伯謂子貢曰夫諸侯之會事  
既畢矣侯伯致禮地主歸餼以相辭也今吳不行  
禮于衛而藩其君舍以難之知鄖為吳地矣漢海  
陵縣屬臨淮郡東漢省晉復置屬廣陵郡今為泰  
州發陽無考今如皋縣亦海陵地縣南十里有會  
盟原相傳為吳楚會盟處春秋之  
世吳楚始終無盟會事意必指此矣

泓上

哀十三年越伐吳郊太子  
友自泓上觀之杜註水名

桐汭

哀十五年楚伐吳及桐汭杜註宣城廣德縣西  
南有桐水出白石山西北入丹陽湖臣謹按

桐水在今江南廣德州西北二十五里亦曰桐川  
源出州南白石山西北流經建平縣界又西入宣

城縣界為白沙川亦曰綏溪匯于丹陽湖入大江  
或謂之白石水杜氏曰白石之水衝突則三湖皆  
為泛溢是也桐汭之名因此漢為鄣縣地後漢中  
平二年析置廣德縣屬丹陽郡晉屬宣城郡隋省  
入石封尋改石封為綏安唐改綏安為廣德存舊  
名也宋置廣德軍元改路明初為府改縣曰廣陽  
附郭尋降州  
省縣入之

顏黃

杜註顏黃吳地或曰今在寧國府境黃氏

笠澤

哀十七年越伐吳吳子禦之笠澤臣謹按笠  
澤即震澤禹貢震澤底定孔傳震澤吳南太湖

爾雅謂之具區周禮職方揚州藪具區浸五湖越  
語越興師伐吳至于五湖范蠡曰與我爭三江五  
湖之利者非吳也耶呂氏春秋伍子胥曰燕秦齊  
晉山處陸居豈能踰五湖九江十七阨以有吳哉

史記河渠書于吳則通渠三江五湖吳世家吳王去晉而歸與越爭于五湖又范蠡乘舟出五湖口太史公登姑蘇望五湖大約皆指太湖也韋昭鄠道元司馬貞各援他境之湖與太湖而為五其說不同非是張勃曰五湖者水周行五百里故名虞翻曰太湖東通長洲松江南通烏程雲溪西通義興荆溪北通晉陵太湖南通嘉興非溪水凡五通故曰五湖史記正義曰太湖之中自有五名莫釐之東曰菱湖相傳為吳王種菱處莫釐西北曰莫湖東近胥山曰胥湖長山西北曰貢湖以禹駐此作貢而名長山之東曰游湖吳王所常游也吳中志以貢湖游湖胥湖與梅梁金鼎而五王鑿曰梅梁湖在夫椒山東金鼎湖在杜圻之西魚查之東是也吳志震澤之東北有建康常潤數郡之水自百瀆注之西南則有宣歙臨安苕霅諸水自七十二瀆注之源多流盛故為巨浸東西二百餘里南

北一百二十里周五百里漢地里志會稽吳縣具區在西古文以為震澤今太湖在蘇州西南三十里

艾

哀二十年吳公子慶忌出居于艾臣謹按水經注曰潁水出豫章艾縣桓山西南吳公子慶忌諫

夫差不納居于艾是也王莽更名治翰漢書地里志豫章艾縣有修水水經注作循水曰循水出艾縣西北逕豫章安縣故西安也晉太康元年更名是艾有二水潁合汨以入于湘修合賴以入于彭蠡者也今江西南昌府寧州西一百里龍平岡有古艾城

越

國於會稽

史記越禹之苗裔帝少康之庶子也封於會稽以守禹之祀世族譜越姒姓自號於

越濱于南海不與中國通漢志粵地牽牛婺女之分野也其君禹後丈身斷髮以避蛟龍之害此越國始封之大畧也會稽山名司馬遷曰禹會諸侯於江南計功而崩因葬焉命曰會稽會稽者會計也越傳曰禹到大越上苗山大會計爵有德封有功因而更名苗山曰會稽因病死葬葦棺穿壙深二尺呂氏春秋曰禹葬會稽不煩人徒墨子曰禹葬會稽衣裘三領桐棺三寸蓋陵墓所在故分封支庶以守之也至于越之名則不知所始國語云芊姓夔越是越地不但封禹後師古曰越之號其來已久少康封庶子以主禹祠君於越地耳蓋猶夫楚封于周成王而商頌先有荆楚也其始封之君曰無餘君于會稽山之陰水經註秦望山南有譙岷岷裏有大城越王無餘之舊都也句踐語范蠡曰先王無餘國在南山社稷宗廟在湖之南是也後句踐敗于吳以甲楯五千棲于會稽即此越

在周初常受封得子爵范蠡曰我先君固周室之  
不成子也濱于東海之陂龜鼉魚鼈之與處而龜  
鼈之與同階韋昭曰子爵也周禮諸子之國封疆  
方二百里越不能成子言其國小也韓詩外傳廉  
稽告荆王曰夫越亦周家之列封也不得處於大  
國是己自無餘以下二十餘世至允常宣八年楚  
人盟吳越名始見於春秋杜註越國今會稽山陰  
縣昭五年會楚伐吳事始見于經當是時越之封  
域南至於句無北至于禦兒東至于鄞西至於姑  
蔑蓋跨有錢唐之東西矣昭三十二年吳伐越傳  
曰始用師于越也史墨曰不及四十年越其有吳  
乎越得歲而吳伐之必受其凶定五年越入吳十  
四年越敗吳于槁李哀元年吳敗越于夫椒報槁  
李也越及吳平勾踐入臣于吳已而返國吳越春  
秋勾踐歸至越與范蠡謀定國立城范蠡曰不處  
平易之都據四達之地將焉立霸王之業乃觀天

文擬法于紫宮藥作小城周千一百二十一步一  
圓三方西北立龍飛翼之樓以象天門東南伏漏  
石竇以象地戶陵門四達以象八風外郭缺西北  
示服吳寶欲取吳也城既成而怪山自生本瑯琊  
東武海中山也一夕自來故名怪山范蠡以為崑  
崙之象起游臺其上東南為司馬門立層樓冠其  
山巔以為靈臺起離宮于淮陽宿臺在于高平駕  
臺在於成丘立苑于樂野燕臺在于石室齋臺在  
于襟山勾踐之出游也休息食室于冰厨越絕書  
龜山起怪游臺東郭外小城曰冰室齋于稷山更  
駕馳于離丘語小異蓋勾踐始去夫餘之居而別  
立新都也哀十三年吳子會諸侯於黃池越入吳  
吳子歸越及吳平十七年越敗吳于笠澤二十年  
越圍吳趙襄子使楚隆入視吳子吳子問史黯得  
為君子乎杜註以黯言四十年吳當亡故問之史  
黯即史墨也二十二年越滅吳距史墨言時三十

有八年越既平吳北渡淮會齊晉諸侯徙都于瑯  
瑯竹書紀年曰晉出公七年越徙都瑯瑯水經注  
瑯瑯越勾踐之故都也越絕書勾踐平吳霸關東  
從瑯瑯起觀臺周七里以望東海是也勾踐七傳  
無疆楚威王伐之盡取吳故地越諸子或為王或  
為君服朝于楚秦始皇滅六國越君立會稽郡  
三十七年東巡會稽刻石紀秦功德漢初無疆七  
世孫閭君搖助諸侯滅秦高帝封之于東越而于  
故越都置山陰縣屬會稽郡地理志曰有禹冢禹  
井本越國也武帝元鼎五年滅東越無餘絕祀順  
帝永建四年分浙東為會稽郡浙西為吳郡山陰  
始為會稽郡治焉晉為會稽國宋仍為郡隋置吳  
州尋改越州唐仍之五代時屬吳越國號東府宋  
仍為越州高宗南渡升為紹興府今仍之府城即  
越王所築之小城也當時以無餘故城為大城故  
謂之小城隋時楊素增拓之廣四十五里大城今

謂之越王城在府南十二里龜山即怪山在府東南  
東北六里稷山在府東五十里會稽山在府東南  
十二里再按句踐初歸越吳封以百里之地東  
至炭瀆西至周宗南造于山北薄於海蓋不得有  
浙西之地也後又增其封東至于勾甬西至於攜  
李南至姑末北至於平原縱橫八百餘里則視  
允常之故封又加廣矣允常時北至禦兒禦兒謂  
守禦邊境之卒文種曰吾用禦兒臨之是也今亦  
曰語兒鄉即石門縣地攜李則在嘉興府南其間  
有石門鎮在石門縣東二十里吳人壘石為門以  
距越即其處也是則吳敗攜李時  
攜李地尚屬吳故編之吳地中

姑蔑

哀十三年越伐吳王孫彌庸見姑蔑之旗杜註  
姑蔑今東陽大末縣臣謹按越境西至于姑

蔑即此秦置大末縣屬會稽郡漢因之晉屬東陽  
郡隋廢唐復置又廢貞觀八年改置龍縣屬婺

州錢氏改龍游宋初又改盈川南渡復故今仍之  
屬衢州府治境在縣北古為姑蔑地或曰穀溪之

南即其  
故城

甬東

哀二十二年越使吳王居甬東杜註句章縣東  
海中洲是也臣謹按國語寡人其達王甬句

東即此句章即越之句無闕駟曰句踐之地南至  
于句無後并吳因大城之章霸功以示子孫故曰  
句章秦置句章縣漢因之元鼎中遣橫海將軍韓  
說出句章浮海擊閩越是也東晉徙小溪唐省入  
鄞縣其漢時故城在今慈谿西南三十五里海中  
洲即舟山是也一名翁山唐開元中置翁山縣尋  
廢宋熙寧六年改置昌國縣高宗航海至此金人  
來追縣為所陷元升為州明初內徙地虛海防說  
舟山為里四為舉八十有三五穀魚鹽之饒可供  
數萬人今曰定海山置縣屬寧波府其地在定海

縣東北定海縣錢氏  
置晉亦句章縣地

冥

哀十九年楚公子慶公孫寬追越  
師至冥不及乃還杜註冥越地

徐

國於徐

韓氏曰徐與秦俱出伯翳為嬴姓國路史曰  
伯翳子若木事夏襲翳之封後有費昌為湯

御費仲事紂其立於淮者為嬴氏夏世有調王命  
以徐伯主淮夷周初僭稱王後漢書曰穆王分東  
方諸侯命徐偃王主之偃王處潢池東地方五百  
里行仁義陸地而朝者三十六國史記趙世家繆  
王使造父御西巡狩樂而忘歸而徐偃王反穆王  
自馳千里馬攻徐偃王大破之博物志穆王遣使  
至楚使伐之偃王仁不忍鬪害其民為楚所敗走  
死彭城武原東山下百姓隨之者萬數遂名其山

為徐山又禮記邾婁考公之喪徐君使容居來弔  
容居稱我先君王西伐濟于河蓋其潛王非一世  
矣宣王二年命召虎平淮夷尹吉甫作江漢之詩  
王又自將伐淮徐召穆公作常武之詩其詩曰率  
彼淮浦省此徐土又曰不測不克濯征徐國又曰  
徐方不回王曰還歸即此徐國也路史又曰自若  
木至偃王三十二世為周所滅後封其子宗為徐  
子莊二十六年公會宋人齊人伐徐始見於經僖  
三年徐人取舒杜註徐國在下邳僮縣林氏曰舒  
者楚之黨徐人取舒為齊桓通道也僖十五年楚  
人伐徐傳云徐即諸夏故也諸侯救徐十七年與  
齊人伐英氏昭四年經書會于申楚人執徐子知  
為子爵六年楚使蘧洩伐徐吳人救之敗楚師于  
房鍾十二年楚使五帥圍徐以懼吳楚子次於乾  
谿以為之援十三年靈王縊於乾谿楚師還自徐  
吳追獲其五帥二十七年吳闔閭弑王僚王母弟

公子掩餘奔徐三十年吳子使徐執掩餘掩餘奔楚冬吳子伐徐防山而水之滅徐徐子章羽奔楚楚城夷以處之後仍為楚所滅臣謹按徐地漢置徐縣屬臨淮郡後漢屬下邳國晉仍屬臨淮郡宋屬淮陵郡齊省梁于其地改置高平郡東魏又置高平縣為郡治隋初郡廢縣屬泗州尋改徐城縣唐仍之括地志徐城縣西四十里有大徐城即古徐國也又西為下邳僮縣孔穎達曰杜言下邳僮縣東南有大徐城此蓋釋例之文合而觀之知古國正在徐僮間耳漢十四年黥布反渡淮擊楚與楚戰徐僮間即此魏收志武定七年高平郡治大徐城蓋以漢置徐縣為小徐城也隋仍置縣于小徐城因以大徐城為徐城鎮胡氏曰鎮在泗州北百餘里唐上元初淮東節度鄧景山拒劉展于此徐城軍潰咸通九年桂州叛卒龐勛行及徐城即此鎮也五代時徐城縣屬泗州宋建隆中省今泗

謂州北八十里，有古城，相傳為徐偃王築。郡國志亦謂之薄，薄城晉僮縣故城，在今虹縣境，地相接也。

再按：穆王與楚共滅徐，說苑後漢書作楚文王淮南子作莊王，皆非同時誤。

### 婁林

僖十五年，楚人伐徐，于婁林。杜註：婁林，徐地，下邳僮縣東南，有婁亭。臣謹按：婁亭在今虹縣

北東

### 蒲隧

昭十六年，齊師伐徐，至于蒲隧。杜註：蒲隧，徐地，取慮縣南，有蒲姑陂。臣謹按：蒲姑陂在今虹

北縣

### 淮夷

昭元年，趙孟曰：周有徐奄，杜註：二國皆嬴姓。書序曰：成王伐淮夷，遂踐奄。徐即淮夷。臣謹按：

賈逵曰：書序言淮夷與奄同伐，此徐奄連文，蓋徐即淮夷也。服虔曰：此徐即魯公所伐徐戎也。費氏

云淮夷徐戎並興孔安國云淮浦之夷徐州之戎並起為寇則徐非國名也杜氏蓋同此二說再按序云徐夷並興東郊不開則此戎在魯之東故得與奄相比非徐境矣又孔傳云此戎帝王所羈縻統叙故錯居九州之內秦始皇逐出之則聚族而居於徐境者甚多矣世本淮夷嬴姓僖十三年淮夷病杞昭四年淮夷會于申昭二十七年范獻子曰季氏甚得其民淮夷與之杜註淮夷魯東夷即此

巴

國於巴

巴國蓋古有之山海經伏羲生巴人竹書夏帝啟八年使孟涂如巴淮訟華陽國志曰巴

人從周師伐殷巴人善歌前歌後舞而入武王有天下封其宗姬于巴爵之以子昭十三年楚共王

使巴姬埋璧于太室之庭知巴為姬姓昭九年王  
使詹桓伯辭於晉曰巴濮楚鄧吾南土也桓九年  
巴子使韓服告于楚請與鄧為好鄧南鄙鄆人攻  
殺巴行人楚鬬廉及巴師圍鄆始見于經杜註巴  
國在巴郡江州縣莊十八年楚文王即位與巴人  
伐申而驚其師巴人叛楚文十六年楚人秦人巴  
人滅庸哀十八年巴人伐楚圍鄆楚公孫寧吳由  
于遠固敗巴師于鄆戰國時巴亂其臣巴蔓子以  
三城請救于楚事定而蔓子伏劍死請以頭易三  
城楚人義而不責其後蜀王苴侯與巴王為好  
蜀王討之苴侯奔巴巴為求救于秦秦使張儀司  
馬錯滅蜀師還并執巴王以歸巴地遂入秦惠王  
置巴郡漢置江州縣為郡治華陽國志巴之封境  
東至魚復西至樊道北極漢中南極黔涪其民質  
直好義土風敦厚鄴道元曰巴有三關枳之陽關  
其一也從枳道入析丹涪水與楚商於相接秦之

滅巴也。楚亦收其地之近者以自廣。而張儀已取其黔中。蘇代所謂楚得枳而國亡者也。巴都屢徙。江州其最初之都。江水逕其城南。三折如巴字。因以名。漢高祖亦發巴賁人以定三秦。故漢樂部有巴渝舞。蜀漢章武間分巴郡為三。巴西治閬中。巴東治魚復。巴郡治江州。如故。晉因之。梁武陵王紀鎮蜀。置楚州。隋改渝州。又改江州為巴縣。唐因之。宋崇寧中改恭州。後以高宗潛藩升為重慶府。自隋迄明並治巴縣。今仍之。

春秋地名攷畧卷十一